





恭州繆澧南先生著

餘園詩鈔

崇素堂藏板

餘園詩鈔者海陵少司寇繆湘芷
湘芷字子文海陵人
 司寇天秉絕人自少負穎異才有
年
 成進士讀中秘書敷歷館閣者十餘載
既而司衡
 三楚所至汲引寒畯還朝後聲望益隆
游陟御班
 為西曹之貳願生平酷嗜吟咏薰習卷
軸有得輒
 形於篇今稿中所載古近體之作雕刻物象牢籠
 萬有具韓蘇之逸氣兼范陸之清標蓋非苟作者
 憶司寇於康熙己丑入翰林躬逢

盛際海內晏閒承平士大夫趨石渠之署窺天祿之
 藏舍著述固無所事事而况以雄才茂學蹀躞其

恭州繆澧南先生著

餘園詩鈔

崇素堂藏板

餘園詩鈔者海陵少司寇繆湘芷先生之遺稿也
司寇天秉絕人自少負穎異才有聲江淮間中年
成進士讀中秘書敷歷館閣者十餘載既而司衡
三楚所至汲引寒畯還朝後聲望益隆洊陟卿班
為西曹之貳願生平酷嗜吟咏薰習卷軸有得輒
形於篇今稿中所載古近體之作雕刻物象牢籠
萬有具韓蘇之逸氣兼范陸之清標蓋非苟作者
憶司寇於康熙己丑入翰林躬逢

盛際海內晏閒承平士大夫趨石渠之署窺天祿之
藏舍著述固無所事事而况以雄才茂學蹀躞其

間吐屬風雲潤色鴻業所謂懽愉之言難工者願
可同日語乎哉且司寇理官也必聰明慈惠者始
克奏祥刑之績或公餘有所寄託發諸聲韻賢者
所不廢也乃近代如有明嘉隆間王季主壇坫而
同時七子者半官比部我

朝新城王先生為風騷宗匠而秩亦終於是官今司
寇位與昔賢埒而詩亦嗣厥媿焉豈平反之職非
敦厚爾雅之人無以稱歟抑曹司之地靈使之然
故古與今不約而同趨歟不然何揚權者之踵相
接也余自庚辰通籍時司寇以諸生遊輦下輒以

直
篇翰見投流逸宏富心竊傾慕之逾數稔而余入

內廷司寇亦登上第遊詞垣方謂聯步冰銜從容笑
語得盡觀篋衍之蓄徒以禁近趨承踪跡濶絕名
章雋句不去諸懷者四十餘年矣今嗣君集琬將
梓其詩而携以問序於余余始得窺全豹因以諧
夙願焉蓋不勝故舊存歿之思而又幸榮世之業
必傳於後無疑也因不辭而為之序

乾隆九年歲次甲子季冬月桐山弟張廷玉拜撰

宋史稱楊文公億欲作文則與客飲博投壺奕棋諧笑而不妨構思令門人傳錄手腕欲脫而泉湧不窮每讀至此未嘗不歎為一代文豪恨吾目中不及見此人也乃若吾澧南繆公庶幾近之矣公生有異稟於書無所不讀自弱冠即以詩名噪淮海間時商工宋中丞牧仲開府吳會有十五子詩之刻澧南與焉海內爭相膾炙謂公詩如韓潮蘇海不可一世雖十五子各不相下而終未若髯之軼倫超羣也公既成鼎甲入翰林敷歷內外晉貳秋卿其樹立卓卓姑不具論顧公為先宮詹門

下士自己丑以來與余全館閣臭味至相得當是時公餘訂約文壇酒社徵召無虛日每嘉時勝賞襟裾交集公於衆中拍浮引滿至興會處掀髯四顧旁若無人擊鉢而宮商立奏义手而風雨遄飛奚奴拂紙濡墨數人不能給此與楊文公之飲博投壺何以異哉然公性嚴整不以所能加人其所著作輒復棄擲不自惜今所存者千百中之十一耳公子集與弟琬哀其遺詩若干卷將付梓人而請序于余余受而卒業但覺其氣韻沉雄則幽燕老將也風流自賞則三河少年也其天然自得則

陶彭澤之絳雲在霄舒卷無心也其冲融蘊藉則王右丞之秋水芙蓉倚風自笑也牢籠萬象不名一家信乎今世作者前後林立而終未若吾髯之軼倫超羣也嗟乎公之才不竟其用而詩文之僅存者亦止吉光片羽讀公之詩慕公之爲人者徒嚮往於海山兜率間而公之亡已十六年矣余與公為孔李交而公子集又出余門深幸杜家宗武之能世其業也乃為叙之

乾隆十年歲次乙丑夏五月溧陽世弟史貽直拜撰

今人誦慕古人每深生不同時之恨故論世知人始稱尚友以意逆志乃善說詩非古人心志難知時世隔越無由驟通不獨我恨不見古人即古人亦恨不見我爾假令有生同時而志相得者為之疏通而證明之使讀者灼然知其志意之所存豈不傳信當時取快後世哉典論謂文人相輕自古而然如沈范之於何遜穎士之於李華一時推賞傳為美談然不數見也至如法言太元必待後世復生子雲乃得知之豈可旦暮遇乎然則古今人恨不同時即幸生同時非相知之久且深者亦莫

能知其志意之所存而為之疏通證明以傳於世使讀者增快也余與少司寇澧南繆君可謂相知之久而且深矣今讀其遺詩不禁泣然以悲復展然以喜焉憶余為司業時君方肄業成均一見即以公輔期之旋登上第入禁林為館閣前後輩然君始終以師事余在長安二十年晨夕過從雖風雨未嘗輟也君家泰州擅甲第園林之勝意氣雋逸豪於酒而雄於文談論風生所至一坐傾倒皆目為太白子瞻輩流新詩脫口人共傳誦往往歛手擱筆爭推讓君以是才名器識藉甚公卿間

此當世所共知而余竊以為未得君之深也君至性惻歎內行淳備尤篤於師友之誼患難生死不稍變易余甲辰撫浙後因事坐累羈寓吳門艱虞備歷君視余疾難如切已身左右維持殫竭心力尺書每至綢繆徃復雲山千里如周旋几席間至今感激沉吟猶不禁涕淚之流落也是則君之為人與君之所以為詩者概可知已君以宏才碩望受知

兩朝游登卿貳聲績茂著不專以詩名家然自公稍暇即偕同人觴咏竟夕忘倦每當四座言歡分題

刻燭之會君觚飛翰灑篇咏立就今睽隔幾時把
卷幽吟君之鬚蒼笑言顯顯如在目前而九原宿
草求曩時契晤邈不可得能不悽愴傷懷如古人
之不作乎此余所為泣然而悲者也然鼎鼎百年
一時榮華赫奕照耀珂馬敦盤玉帛奔走海內俯
仰之間聲銷影歇求片言之足傳後世者而無有
矣君言行既多可稱復有子世其家學葆茲遺文
無敢失墜珠光玉烟久而彌新即鬚蒼笑言長留
千古使後之誦詩者如見君之為人披覽叙述之
餘能不展然而喜也乎君之詩發於性真如秋水

芙蓉不假雕飾清新瑰麗無美弗備古詩上凌鮑
謝七言尤宕逸縱橫近體格老意新元白錢劉抗
行無讓而君之虛懷古誼卓乎不可磨滅者自流
溢於豪楮之外固無待於余之叙言以傳而竊以
相知之久且深既有以識其志意之所存忍不為
之疏通證明使天下後世誦其詩者有不知其人
之感乎此老人所由悲喜交懷而不能已於言者
也余弱冠登朝所交當世鉅公長德倭指可數五
十年來朝露晨星所存有幾回念平昔笑言酬酢
都成陳蹟獨君之鬚蒼顯顯尚與斯集而俱傳每

嘗謂君高誼當從古人中求披尋是編不獨如遇
古人直如對古人矣後之讀君詩者固當因余言
而增尚友之快或且有感於友朋急難之誼而轉
深生不同時之恨也夫豈

乾隆八年歲在癸亥中秋日北平友人黃叔琳拜
撰

吳中山水清淑甲天下自古多磊落君子作為文
章振英聲騰茂實以垂諸不朽及

本朝名卿鉅人先後輩出而吾同譜 澧南繆君其

選也君學術淹雅於書無所不讀其為人循循然
束身槩獲不越尺寸早歲游京師名噪輦下既而
登大科由館閣位至侍郎清脩峻望著在搢紳而
性好為詩一吟一咏恬然終日不自知其嗜之篤
每進愈工而未能自己也君既歿諸子俱占甲乙
榜克世其家學叔也官司城理繁治劇不廢嘯歌
以余與君交最久他日乃輯君遺詩將刻之而請

序於余余不禁撫卷流連而重有感也猶憶往者
共君官翰林朝夕過從意氣甚相得休沐之暇數
與倡酬受君益者良復不淺後各以官跡内外出
入不獲時時相見更十數年而君已亾亾又十數
年而見君之子且讀其詩疇昔相羊文酒之懽網
羅掌故之美以至承明之廬蓬山之觀聯裾接武
宛如昨日事而君竟怛然以化歸主芙蓉之城矣
詩筒茗椀顏色杳然不可復接余又何能不慨然
耶君生平為詩至多不自收拾散佚者衆今令子
所編集凡若干卷卷首為五七言古次律絕次排

律諸體俱備卓乎可傳昔向秀與嵇呂遊後經山
陽聞笛愴感乃為思舊賦以寄其意余之叙君詩
也亦不自知泣數行下也

乾隆九年歲次甲子中秋前五日汲林門年眷弟
阿克敦序

少司寇餘園繆先生以文章經濟受知

兩朝天不憚遺未竟其用士論惜之早歲以詩鳴散
華振藻雄長一時與同鄉史先生蕉飲顧先生花
田王先生方若宮先生恕堂後先鵲起分茅設苑
風騷之主獨盛東南修生也晚不及與諸公上下
其論然讀過江雄雌樓村甲巳諸集慨然想見其
為人獨先生官中朝位益高望益重蹇蹇嶽嶽為
時名臣脩逐隊公車拜謁床下而飢寒奔走僕僕
道塗未得請先生詩傾囊倒篋而讀之願時時往
來於心而不能一日去也巳酉之冬先生已歸道

山而修入館也以庚戌使阜厠名後進接先生言
論風旨於槐廳棘寺之間暇則出其歌詩從容就
正先生或以為可教而不我遐棄烏向時一瓣香
敬為魯南豐庶幾可以無憾也而不謂修之晚遇
也嗣君義圃玉叔輩能讀父書哀遺集之現存者
而授梓修故述生平嚮慕之誠與不獲承學之憾
與鄉之諸前輩生不同時者同一今昔之感焉而
詩之溫柔敦厚莊麗芊綿則非余小子所能贊一
辭矣

乾隆乙丑春三月同里後學程盛修頓首拜撰

詩言志者也又曰詩以道性情夫人志定而專則
功力深功深則性情漸移其中心所孤詣或不能
以告語而發之為詩則精神畢露千載而下有如
覲面古今來忠孝節義以及偉竒曠達之士其所
為詩不求工而自工此有本焉非可以襲取也余
自為諸生時讀湘芷繆公制藝高雅秀潔想見其
為人癸巳余獲與館選幸出太羹俞夫子之門而
寓於文良公高夫子家繆公於太羹夫子為姻親
而與文良公詩酒往還余因得瞻聆其議論丰裁
其所為詩歌喧傳都下間亦得寓目焉已而公列

卿班貳司寇方將大有所為而倏焉溘逝其所志與所學既有所未竟而詩文之流落人間者不過泰山之豪芒惜余又未獲全覩蓋常耿耿不忘於懷也乙丑春余寓居京邸其嗣君玉叔始以所輯餘園詩鈔見示古體登蘇李之堂格律入王孟之室至其七言長歌沉雄綺麗尤稱獨步反覆展玩氣象萬千其冲淡超遠如見其志趣之高其纏綿悱惻如見其性情之厚其駿偉發揚如見其啣杯揮毫之睥睨其慷慨憑吊如見其長願遠慮之深衷也不特聲音笑貌宛然如繪并其志之所未竟

與所得之不能以告人者亦借是以傳焉是宜梓而公之使天下後世慕繆公之為人者讀其詩如將見之抑使慕繆公之為詩者學其志之所之性情之所造詣或庶幾其有當焉毋徒求之章句之末也

乾隆乙丑春臨泉後學孫嘉淦拜撰

世之專以詩名者談格律整隊仗校量字句擬議
聲病以求言語之工言語亦既工矣而么弦孤韻
終難當夫作者唯先有不可磨滅之概與挹注不
盡之源蘊於胸中即不必求工於詩而縱心一往
浩浩洋洋自有不得不工之勢無他工夫在詩外
也得此意也可以讀少司寇澧南繆先生詩先生
為諸生時學殖文章即已包孕餘子貫串古今既
而取高第官侍從秉史筆柄文衡佐秋官人文國
論儲峙胸中未嘗斷斷焉以詩自鳴爭短長於音
韻藻采間也而出其緒餘揚扞風雅或渾淪磅礴

地負海涵或鋪陳終始排比聲律或含吐醞藉風
標俊上而流連景光刺畫蟲魚者亦間及焉所謂
五岳起方寸讀書破萬卷者非先生不足當之則
先生之詩有盤蓄於詞華未吐之先者也先是商
止宋公撫吳定江左十五子詩先生詩排纂成列
商止意尊韓蘇故於橫空硬語超邁俊逸者多所
採擇今商止所收集中祇存其半豈散亡零落一
時有未及網羅者耶抑先生悔其少作境界層累
益高而向之馳驟於孟縣睂山者有芟薙獨多者
耶惜乎商止不及見之末由進而與之商榷也德

潛年三十歲時即能讀先生詩而相距大江南北
未嘗請謁後先生官於朝踪跡益遠歲乙卯召試
來京先生又成古人惟經其寓廬登著書之堂撫
嘉樹坐盤石與其門下士徐澂齋前輩遊得悉先
生流風餘韻迄今又七八年乃得盡讀先生遺詩
迴憶前三十歲時杳如昔夢而潛之年亦既頽然
老矣子思子云昔我有先正其言明且清唯先生
之謂歟令嗣官京師屬潛州序因道其詩外有事
在者以表異於駢花儷葉之流而人之求工於鈎
章剡句間者亦可以讀先生之詩而爽然自失也

夫

乾隆八年癸亥春莫長洲後學沈德潛題於旅寓
之夷白齋

予髮甫澡侍先文貞公趨庭之暇即弄柔翰維
時耳湘芷繆公名藉甚然初未相識也既官翰
林同年願書宣為予言湘芷泰州人青年負雋才
偉貌修髯不可一世奇士也予心益嚮徃然卒不
可得見未幾左官劍外日對賓人麈客鞅掌簿書
間望春明如在天上復安能與京洛偉人道欵洽
申縞紵乎迨甲申孟夏叨卓荐隨牒入都適先
文貞公宴客翬裾粲列時於座中覺此君小異及
叙談果吾湘芷也於是欣然訂交若夙契焉是秋
月夜公讌於城南水閣與湘芷同賦詩予分得橫

陳序
字又於萍廬公讌湘芷才思泉湧風發予亦黽勉
角逐劣得并驅已而相對大笑謂此樂殆未曾有
也暨乙酉予捧檄入秦中己丑湘芷登鼎甲上玉
堂踪跡踈濶矣然關隴音書往來絡繹不少間也
既而予自岷丞量移儀部乃復得與湘芷晤於都
門猶憶壬辰上元前四日奉先文貞公命招集
一時名公卿讌於萍廬時周寒溪太史手出題
先公午亭文編卷尾詩相示座客皆用原韻各賦
二首而湘芷詩尤為先公所激賞一時名流咸
斂手推服無異辭蓋先公好推獎人才而湘芷

卓然以詩名樹幟騷壇有以也無何予銜恤歸里
呻吟草土無復壯心而京華舊侶雲散風流渺不
可即宦途通塞仕路飛沉種種不一而公筮羽卿
貳旋作故人予亦彳亍內外髮落齒危老困郎署
三十年中如刹那頃良可歎也令嗣香令司東城
葺公遺集而以叙見屬予與香令為忘年友死生
存歿之感有弗能已於言者第公之詩未獲全覽
而當日倡酬之什亦有不見集中者香令其諦詳
之母令吉光片羽埋没人間可惜也

乾隆乙丑蒲月中浣同學世弟澤州陳豫朋撰

餘園詩鈔卷一目錄

五言古

王孝子詩

草堂酒熟侍家大人作

雨中登山有感和音隱先生

中元月夜露坐納涼

和昌黎先生秋懷之二

賦得清溪流不極

和陶靖節飲酒羲農去我久一首原韻

咏古介得大蘓大小戴

北溪脩禊用陳思王雜詩韵

齋居

清響園夜坐

擘笋

八月五日新霽見月

草堂叠石初成贈李老

同甸洋二弟望花嶼草堂

新堂種竹用石湖盤龍嶧韵

郊遊飲古寺内

舟泊瓜浦寄書宣翰編

渡江叠集宮丈恕堂韵

六境圖 并序

洗墨池

忘歸巖

潞亭

鵲華秋色堂

煙江叠嶂堂

滄浪亭

吳山山後觀亂石

飛來峰

登鳳山頂望錢塘江

渡錢塘江

龕山望海

大泗滙

刺涪山

紹興太守招遊蘭亭

梅山

三江口

渡曹娥江

山雨乍霽由桃花澗歷天開巖觀禹碑望最

高峰慨然有出世之想

鏡湖寓園對竹

石屋

蠡山

管家山松雪夫人故里再疊前韻

白乳泉

西栗樹

別山陰

與顧俠君

秋聲

九日大司農吉水李公邀同城南登高以竹
露閒夜滴松風清晝吹為韻

顧書宣出城南登高詩見示和韻十首

重九後一日陶然亭登高以迴潭石下深綠

篠岍旁窻為韻

題望雲圖

宋山言索題鋤瓜圖

小農詩

同諸子飲菊花下

劉節婦詩

種花詩和夏重韻四首

隆教寺桂花

同人集棗東書屋分賦庭前花木錄存三首

李蒼存席上分賦得李夫人

東方朔

送程姬田南歸

遊龍渚寄招民長又昭于宮

題春雨草堂圖

題溧陽溪山圖

風氏園旁數武有武家窰與黑龍潭相對水

木清華渚淑環互風日澄霽死似江南癸
未甲申間時從興化總憲往遊公身居廊
廟性嗜煙霞將於此移築廣陵館以為登
臨之地未幾仙去俯仰之間頓成陳迹丙
戌秋杪同人復集此地悲從中來罷酒不
懌憑高南望有淚沾裳諸君不知以余為
酒悲也歸來燒燭成五言古一章

同熊東湖陳絨齋六觀周桐埜諸前輩遊萬

泉寺

陶齋同諸子論文偶集

和陳絨齋前輩集飲熊東湖學士齋中原韻
種花再疊前韻東絨庵東湖六觀滄洲
滄洲疊示近詩三疊前韻贈之

九曲亭

下有吳
王峴

春夜同徐壇長登黃鵠山尋梅達曉歸望山
堂用壇長洪山紀遊詩韻

丙申臘月二十八日雪中同壇長寧先綱齋
登陶然亭携酒過風氏園偃松下畱連竟
日余口占起句歲暮小除夕雪中看偃松
及來邱舍塵事縈心未續成篇庚子正月

壇長訪余鄂州使院出偃松詩見示仍用
余起句時寧先在京師綱齋奉使至安南
感事懷人依韵奉和

秋日同年集寧先寓齋送坤掌南歸以雲淡
水容夕雨微荷氣涼為韵得夕字

餘園詩鈔卷一

男琬集校字

亭間繆沅澧南氏著

後學

沈德潛

金志章

編輯

五言古

王孝子詩

丁徭日繁重閭戶多逃亾文安王氏子颺泊辭故
鄉棄我舊井竈舍我舊耕耒甘心離匹耦各自東

西翔

故鄉不能歸涕泣淚如雨一燈何熒熒健婦堵門
戶生兒在襁褓日夜尚須乳

兒生未十暮兒志如成人上堂見阿母兒有平生
親兒生不知父兒不如鮮民阿母為兒言汝父久
埃塵上天與入地欲見愁無因孝子聞母言含淚
聲酸辛

酸辛不能語獨立心踟躕奉母居道旁冀得達音
書朝來撤勞薪為客具晨炊客有遠行者孝子前
致詞兒生自有父遠隔天一涯長跪進履襪為兒
一尋之荏苒又十年消息斷路岐

團團復團團為兒授家室登堂見花燭吞聲哭不
得兒生未識爺何以安枕蓆誓辭連理枝永遠事

行役再拜阿母旁泣血浣顏色

出門何所之惘惘別里門長號感行路天地為之
昏日則望雲馳夜則戴星奔飛蓬冒天末何處尋
本根

出門無所之竄身落山椒望見田橫島悲風何蕭
蕭海水為不流嗚咽凝寒潮

意行大壑旁僵卧荒祠外精誠動木石冤魄交冥
昧開門揖老叟夢中與神會午食見指南莎羹未
粗糲當歸乃隱語不聞附子膾

迤邐入東南山澤形神枯黃沙蝕顏面瘡痍生肌

食園詩集卷一
二
膚果然帶山下夢覺逢精廬佛香颺院落有客蒼
髯鬚詢知舊鄉里驚喜立坐隅尋聲猶識得精神
相感孚父子抱持哭淚落千闍黎

慇懃勸還鄉緇林戒行李入門見老妻毀顏已暮
齒新婦潔盥餐為翁具甘旨至行格天地和氣泱
庭宇高曾遺矩矱子孫遍朱紫至今道旁人齊歌
王孝子

草堂酒熟侍家大人作

入門寒筠青林端露殘雪拂拭衣上塵寒威倍凜
冽冬缸漉浮蛆晶晶瓦杯凸盃餐婦手操餽釘亦

芳潔藉以奉親娛形神頓超越小弟嬉前楹刺刺
語離別夕陽映松扉古梅枝秘醇盡此一日歡萬
事總蠓蟻泄泄父子間至樂忘言說

雨中登山有感和音隱先生

雨自梅花來香色浣春水環流碧山前芬芳不可
止春光九十分二分已如此何況爛漫時的灼非
徒爾柳線綰微綠小萼潤瓊蓋雲光裏曉煙晶瑩
明鏡裏遙盼遠林色青影層層起迴看方池上春
天在其底猶撼多浮陰面目真難洗炎涼世所爭
清冷性所喜翻覆作波瀾恬靜能有幾不如安石

情隱約居朝市山墅自怡神蕭然折芒履仙源不
可問雲山自此始抱膝長日吟管樂何須比南陽
有卧龍出處如斯矣

中元月夜露坐納涼

秋色夜方倩餘暑清高林搖扇穿曲廊涼月散人
襟雲樹相玲瓏虧蔽環幽岑至止溪亭上夾道垂
古陰煩囂一以滌輕風如可尋願言求圓嶠荷氣
生仙音

和昌黎先生秋懷之二

秋氣日蕭瑟林樹空凌凌凜然掩關坐木強同癡
蠅自顧不諧俗焉能免愛憎四壁銷晶光古劍無
鋒稜空潭積鐵色黝黑不受罾歛手息故轍利涉
非我能

長漏杳不迴小明天轉暗四顧紛寒螿啾唧汝何
憾羣動曉未息曙光孤可瞰張我松下琴賞音在
孤淡世人熟箏琶未遑辨真濫悅耳竟何常為時
亦已暫枯桑號天風海濤吹斷纜忍饑且誦經精
神自默勘浮華堪冷齒驗器瓶與甌

賦得清溪流不極

山水有真樂愛翫忘春秋泛舟沿溪上眷彼峰巒

幽枉渚無靜紋澄潭鮮激流誅茆縱未能信宿常
淹畱

輕颺扇百卉林壑非蕭蕭春條葉未生靈雨何時
颺迴波無終窮浩浩流昏朝幽人作水觀晏坐形
神超

遠峰何縹碧迴潭尤淥淨空明百丈水簸蕩如圓
鏡此中有高人卓立天骨勁纖翳胸不畱澄澈乃
本性

逝者疾如此歲月恐不居及時愛景光下學甘迂
踈汗濺洗凡濁涓潔歸真儒大道直如矢川塗無

鬱紆

和陶靖節飲酒義農去我久一首原韻

未造方任運達人思葆真抗志慕皇古惟以迓吾
淳六經正燦設光景日常新俗學尚虛無咎不在
嬴秦禮樂若桎梏典籍同埃塵卓哉柴桑叟述古
何慙懃途遠轍自合跡異神彌親昭然揭大義為
世通迷津獨立魏晉中岸然古冠巾飲酒乃寓言
所念義皇人

咏古不得大蘓大小戴

何年月出斗墮地賦衣帶月吐我眉山竒才浩燿

海無乃遭時君文字賈禍敗貶官成其名聲施寧
足怪登朝轉可悲過海亦誠快晚逢春夢婆獨見
風流態 大蘓

揚雄稱僭經其文自有別何意君弟兄乃與聖經
列笑視高堂生拍碎烏皮節 大小戴

北溪修楔用陳思王雜詩韵

青春老無言碧水平前林嬉遊遵古禮湖海安能
深乘舟遊遠天緩風渺難任袂滌臨幽溪何地非
沉吟自適雲鳥性漫云絲竹音風日甚清佳此水
堪洗心

扁舟何所適薄言隨輕風春積水愈明置我青天
中誰與浣白雲幽賞不可窮長嘯謝酒兵孤意却
女戎息之以機巧道腴腸能充辭之弗更道古今
耐人老

北地有佳人當春謝桃李思之春已暮餘情滿中
沚歌苦知音稀吞聲任冷齒所恨時不再良媒孰
云恃

颺然千里思不如咫尺遊咫尺輒已遠但為艱同
仇同仇未可得門戶安可由何必慕古人品目以
風流彼自記蘭亭我亦有蘭舟誰為辨優劣聊此

捐繁憂

夕陽尤可愛歸霞如高軒遠光不可約變態生平
原大哉立造化一日同一元晚煙平不動孤塏翠
小山此境愜余情冥冥胡能言
水嬉自古好何必懷朱楹達人亦有言天地在戶
庭况此姬公禮寧獨嗤遠征自爾喧寂俱亦復欣
慨并古處既迨迨素心且煢煢矢此迥絕意可以
薄世榮靜氣自隱招妙理乃相生濯濯塚旁柏田
田水上萍祭典昔所傳嘉會心所傾年年修禊來
百歲移我情

齋居

一夜白皚皚庭樹變瑤草縛帚煩蒼頭竹屋幾迴
掃單車繼輞水布被起常早適興開故篋翻案理
文藁塵埋字半晦蟲蝕義難曉吟哦如哀猿聲使
鄰舍惱吾生類蝸牛粘壁就枯槁那能學黃鸝日
日矜噉爪終朝但癡坐懷抱幾時好憂來廢書嘆
朱顏可常保

清響園夜坐

綠雪覆層臺燈光散瓊屑風簾噪暮鶯暗影露明
玦豈其學杜鵑愁春啼碧血漏深怯衣單啣杯翻

金言卷一
凜冽繁星燦於螢琉璃淡於雪相逢賦玉筋不用
誇金埒朗咏若幽琴餘音渺難輟

擘笋

籜龍初奮時迸泥凝玉屑誰識凌雲姿已見根芽
潔幽人有閒情劖煙摧碧血銳未擬古錐斲理如
殘玦著手思欲冰朶頤脾早冽甘芳雖足誇初節
陡然折何當待秋風清籟鳴霜雪飡之療俗腸森
森辨等埒鮮華老饕知七箸總難輟異日刺青霄
苦味真堪說

八月五日新霽見月

得月乃知霽風雨誰掃去只今秋天西猶昨屯雲
處初上碧一涯久之光漸露莫訝寒兔瘦餐霞日
豐裕屈指到中秋十指得全數飛瓊步虛來不必
天孫妬色兼野火明挂向枯桑樹暮煙惑前岡照
見歸鴉聚淑嶼青茫茫微影覆如霧老人望南斗
銀河濶懸布何事太空中微雲關念慮

草堂疊石初成贈李老

北郭皆水鄉樓臺漾空碧那知春雨中青山長大
澤一峰卧黃牛一峯起太白不信三徑深而有五
丁劈五丁者伊誰新歸山左客五嶽既以遊岱宗

可以窄百簣覆何多選石為之幘亭午擁歸雲樹
陰受對奕從來造化功大小無定格爽氣撲一拳
巨靈盪餘魄把酒送斜陽小窻日易夕江北有名
山得一以當百

同甸洋二弟坐花嶼草堂

苔衣人跡破前林曳蒼篠疎籬界夕陽暝煙惑歸
鳥陂水秋轉綠斜岡晚可眺粗虫號草間微風漾
斷蓼篔谷間遙浦濯影鷗鷺小秋荷亦離披紅綃
失斷沼水茄白銀色拉雜碧溪繞飢鶴唳層雲清
響覺孤矯吐語驚流輩寄興臨霞表危棧同咏吟

水天色清森快傾婪尾杯俗塵詎能擾

新堂種竹用石湖盤龍驛韻

斷雲耿秋漢雨脚已西沒涼風透竹軒空翠正突
兀冥然把卷坐殘蟬更淒咽時序日已移脫葉舞
木末昏煙惑前岡飢鶴嘯林樾詩人悲老去髡首
愁欲絕浮查不可涉石磴苔衣滑河傾星吐芒冷
露滴華髮忘飢理古操有口付石闕垂頭伴此君
形神頓超忽

郊遊飲古寺內

好風從東來過橋蝴蝶飛嘉茲原隰地交交密樹

依青皇鞭白鹿緩轡迎朝暉古殿冷紺碧大隄環
翠微主人達者流竹垞開煙扉勝地非一狀團團
月魄肥燈光薄疎響晚寒澆夾衣所嗟樹上花零
落地下稀

往歲二三月遊戲來方亭春風動天地人煙為之
青繁花多半開流鶯聲可聽香苞拆含甲浮梗羅
春星同遊支許輩半倚煙中櫺半倚林中花俱愁
春事零而我學道人相對渾忘形歆仄芳草地顛
倒醉不醒歸途度疎磬佛火罨空靈歲月曾幾何
形跡如飄萍

舟泊瓜浦寄書宣翰編

杪冬苦嚴寒歸裝出林樾稍稍晨曦動窅窅寒風
發凍雲壑布帆孤邨澆殘雪凝睇思如何美人在
天末

渡江疊集宮文恕堂韻

泛泛黃篾舫軀幹苦曲俛三老挽桿索可笑無少
快暴風忽震動圓穹狹而褊我身如麤螺簸蕩聽
驅遣嚼嚼浮沫剪塵垢不可洗地踔無厓垠天跳
失關鍵斫斷白蛟脊斧痕遍深淺馮夷呼嘯來猱
獍踏飛輦怪面森可怖奇形見亦鮮乖龍舞澁泮

驍猛四足跣安得施大手屠割上鼎鬻浪絲如匹
練嘉然乍裁剪又如萬馬騰邊沙齧枯萍怪聲與
細響澆滯劣以謏吳牛喘未定勉強就曲鞦寢訛
雖有態疲革力難展三山一水望雲中吠仙犬焦
先笑向我此容顏小忍揮手長謝之汝豈神仙選
木鑽學還丹瓜廬昧墳典括囊空守口歲月恣盤
衍歛噉何地無趨避計亦舛何如狎風波遊行面
無覩俄頃礮車停少馬亂雲卷碧翁著斑瀾噓氣
化灾沴行子甫載途耕氓已出畝沽酒鐵甕城引
觴賀且勉栩栩赴黑甜如塗塞續冤春波搖淨綠

鞞紋浪平充榜人唱銅斗夜靜參旗轉翔步涉廣
庭曠蕩謝屯蹇柁樓罷鳴鉦天風手為牽回視無
底壑失足今知免

六境圖 并序

六境圖為商工公生平宦遊之地其詳見
公集中烏目山人王翬繪圖紀勝庚辰冬
日謁公於揚州官舍出圖相示謹和六章
洗墨池

髯公在黃州五年謝朝請閒客閒處所渴毫日馳
騁坡詩人言此閒洗墨剝為池墨華沾藻荇至今

食言金卷一
吮墨蛙脣黑色逾靚

池蛙食墨口黑載公筠廊雜記

如何遺跡湮

蕪穢同胥井偉人初判郡晏坐樂清景前塵與影
事一笑忽記省訪古坡里坊鑿池可容艇獨木駕
為橋披拂淪漣影雪堂既幽廠竹樓亦高整後楹
羅簡編前庭植文杏合祀宋名賢作記相與永髯
公如神來植杖定細領昔遊曾幾時卅年彈指頃

忘歸巖

虔州山水邦所至足登眺千峰儼玉槩一水如珠
抱茲巖尤瓌竒岡形莽奔峭神工巧爐鞴造化蓄
靈奧得名訝何年創自姚江老凭高豁遠目雙江

流浩浩憶公弭節時題詩上煙嶠振策塵外遊洞

壑窮搜討飛觴偕隱君僧伽為前導

彭處士躬菴魏處士叔子

落葉滿衣裾雲深不可掃尋寺與看山乘興從吾
好酌酒弔陽明後先實同調螺亭一點青城郭煙
嵐繞披圖我忘歸卧遊領其妙

潞亭

東華十丈塵蹴踏沈我衣閒來潞河上洗眼見釣
磯風櫂雁齒列搥鼓當斜暉憶公拄笏來觀察臨
近畿訪古葺小亭嘯咏都忘歸鷗鷺繞檻前撫景
且息機高吟醒夢寐振筆紛珠璣四圍雪色辟深

夜殫朱徽喧囂忽夷曠令人思翠微
森森鮑止水寒碧遙相依盤山在東郊
悵望雲樹稀晴翠落檐際對之色欲飛
至今通路津突兀留清輝

鵲華秋色堂

鵲華好山色颼渺梳雲鬟合杳雲氣繞
碧玉相縈環正如兩美人對照蛾眉鬢
吳興有圖畫妙手追荆關劈窠顏中堂
秋色紛擘放衙紫翠曉捲簾紅樹殷
停車不出戶晏坐看秋山星軺遽南發
未得窮躋攀半年住齊州悵悼別孱顏
韋菴清夢醒幽意兩山間

煙江疊嶂堂

開府洪州時政成晁清曠間為北蘭遊
寄興臨霞上萬朶青芙蓉煙江羅疊嶂
畫本落眼前真宰勞意匠晉卿繪佳圖
結構此倣樣王蘓不可作築堂聊俯仰
匣中趙沈筆補景足相抗晉卿煙江疊嶂圖東坡題詩真跡不可得公有趙承旨書蘓清光好摹寫佳氣倍詩沈啓南文衡山補圖卷
神王曲曲棟花坪名自邵叟創邵君湘一勺尤甘芬澹雪難為狀楮袍與弱笠僧扶方竹杖
賓從皆雅流同時發郢唱東湖諸父老思公還悵望何時節督來空堂再相訪

滄浪亭

平江富煙霞名勝詎云乏劇憐蘓長史遺跡日摧
拉南園幽曠地一水亂鶩鴨舊有滄浪亭荒廢失
修葺復古藉巨公捐貲施版鋪當時太廟灾封事
最淹洽徙謫來中吳歲月熟羊腍顛蹶了一生何
異走夔峽身後萬口傳生前百寮壑數椽妥吟魂
欄楹未福狹春風三月來流鶯嗁恰恰酌酒弔齋
郎精靈對花呷繞亭足流連不須泛苔雪

吳山山後觀亂石

披月訪名山雅具林壑癖歡攜峯竒人芒鞋穿亂

棘造化苦雕鏤皴斲詭裁織穿鑿已殊軌卷然罕
定式性堅理以曲膚皴體難直厥初誰磨礱崔嵬
巧借力當時補天餘散令絕壑殖神漢沆瀣瀆鐘
乳懸湜湜象脰紛可寶猿尻沓莫識幻作眠獅形
猙獰險難陟雜糅如古篆蚪蚪遍劣崩蟹眼光磨
雲幽洞草生翦伸爪作之而權竒杳無極遠坼巨
靈蹠神鼇齒叟叟赭若臙脂錢斑纈有萬億黝如
醜婦癭見之不再憶黃若新鷲拳翡翠穿胸臆我
歎魄磊多填膺悲莫抑青精誰作飯令我好顏色
擲杖歸空林厓柴聞翁息

飛來峰

縹緲一峰出，透露垂無根。拮拄煙霞中，靈秀窺真源。浩如折盤渦，滂然雲崩奔。巨靈施狡獪，斲石雕青痕。宛然靈鷲蛻，仙萼稱離魂。石石有飛勢，樹樹皆掀騫。或比鴻雁翔，或比鸞鷲翻。芙蓉何繡錯，葉葉紛璵璠。嶙峋刺九野，參井歷可捫。下有僊人宅，古洞通潺湲。一逕入山腹，四達皆庭軒。蛇行至其頂，鬪捷驚玄猿。上下煙鬟中，超忽不可言。九垓偏寸土，偏脊引樊垣。何年忽飛去，携我歸崑崙。

登鳳山頂望錢塘江

江濤如雷破春擊，寒天西老黿作長吟。束縮如兒
唬絕頂，凌蒼雯象外，淒以迷俯視。浮海蜃滅沒如
白霓，盤躡據飛厓，百丈窮鈎梯。元精羅心胸，蕩謫
雲霧齊。風急吼鵞鵝，鴻濛歡相携。一髮杳莫窺，弱
水通合黎。

渡錢塘江

大江岷峨來，峰巒恣環繞。迢遙下會稽，風煙隔蓬
島。吳山一點青，滅沒來歸鳥。延佇立沙頭，天濶布
帆小。

龕山望海

雙闕峙海門昏煙亂蒼鶻南際無點青東瀛此疎
豁一氣連蓬壺形神俱超越犀舡與鐵騎簸蕩在
空濶清時靖兵符諸彛敢竊蒞蒼藤帝釋居珠宮
間貝闕回頭叫始皇遺跡空突兀拇窠及履痕千
年勒石骨江豚拜鯨浪舞嘯馮夷窟蓬萊此左股
崖嶠青欲活琅然起嘯聲娟娟映纖月

大泗滙

空濛野色幽寂歷寒巖晚孤棹窮水源三山去已
遠蒼藤倚翠煙小鳥啼層巘薄醉起扣舷樵風夜
來轉

刺涪山

卑視乃寸岑縱觀愜竒眺鑿鑿施金鎚合併愈超
妙陡絕無攀援山腹轉孤峭驚瀑日砰訇斷霞時
寂照半山鸞鳳聲恐是昔人嘯刻削剔江岸埋沒
陷海徼大壑恣谿訝拳石詎敢誚岌然土囊口默
望契玄要

紹興太守招遊蘭亭

崇山疊寒翠曲渚罨迴波緬懷晉名賢修禊雲山
阿時代已銷歇峻嶺猶嵯峩過江富清言晏坐臨
坡陀觴詠饒名理玉屑霏煙蘿共作洛濱戲少長

咸來過娟娟林間月
婉嬋描新蛾風景了
不殊賢
達將如何

名勝蹟未湮川原莽
突兀修復煩清時
朱費捷矧
碑五丈何巍然青
蒼屹碑碣龍文摹
永和煌煌聖
人筆蚴蟉翠螭攢
靨黹卿雲雲吾
皇燦睿藻元
氣遞迴幹蹴踏駕
古人書倉芟軋茁
右軍倘神遊
秀采驚盤鬱異數
邁貞觀佳話傳史
帙

東偏籠鷺館水木迭
清暎旁穿浴硯池
紅泉鑒明
鏡晴光蕩蘭畦瀑
水滴芳徑石澗仿
行觴賓從悉
韶令衣冠祀西堂
軒闥頗幽靚
聖代正崇文珠

衡仰昭炳雅懷印渚
游披藻奮研詠

逶迤紅塘西遠山青
可數高隴墟煙積
寒塘亂流
聚羃歷穿竹林掩映
辨邨樹古寺額天
章緇徒集
粥鼓伊余欵寄人
解帶坐深塢豎義
愧未能辟掛
松枝塵煙中眺蘭
亭正在雲生處

梅山

鼉風鼓巨浪入山何
所之手扶紅藤杖
偶與洪厓
期丹竈雖傾頽異
草如柔脂餐霞去
不返剩藥療
我饑懸厓獨叫猿
驚走無由追東尋
梅子真采隱
從俗嗤

三江口

江光饒淡迤海色轉悲壯蒼萃判濁清混茫非一
狀羣山何脩然各各據霞上巖邑抗峰脊雲樹雜
崕當快哉滄溟遊喜極翻惆悵乾坤此奧區雙眼
豁疎放

渡曹娥江

萬朶青芙蓉嵐光足怡悅小江何蝻蜷奔濤如濺
雪娥兮乘潮來玉佩紛粲設明璫儼水仙驂鸞致
幽絕稍瀆與撒漩真氣相團結想見浮瓜時剝波
犯層穴遙山偃修眉尚露亭亭節

山雨乍霽由桃花澗歷天開巖覩禹碑望最
高峰慨然有出世之想

掬水浣山泥藤床睡初覺空山一夜雨飛瀑千峰
落起來天宇清曉雲露斑駁澗水東西流噴珠滿
大壑宛轉如遊龍天矯不受縛首尾一鼓盪鱗爪
恣挐攫森森疊浪巖皴皴瘦如削起伏生波瀾圓
穹大包絡破碎瓊瑤瑛跳擲狙獠攫趺坐作水觀
清響聆竽籥喧極靜意俱冥心契寥廓曳杖行前
岡適與山僧約將窮最高峰搜竒出齷齪徑路共
猿爭上下似鳧躍厓花冑葛衣茵露濕芒屨枯藤

立伶俜倦蝶穿畧行搖搖鳳折膝戢戢牛礪角攀
躋高送眼崎嶇危著脚山果團青紅酸甜漸可剥
朋亭寄生草蔓引攝生藥幽巖從天開化工巧鏡
鑿陰磴竄猩鼯陽竇捲亂籜石軒久傾頽空壁就
捫摸禹碑古篆竒鸞颺還鳳泊如從岫嶮過探竒
自南嶽松風迴杖底人語出林薄絕頂望茅茨天
風隔蓬弱梵唄音琅琅木魚間金鐸振衣擬往從
十步三四卻開山思法度團瓢此棲托我生實鈍
根踪跡判塵濁僧寮一月住飲啄類孤鶴何當將
家來鑿坏飽葵藿

鏡湖寓園對竹

喧囂非所耽茲堂宜在野蕭森數竿竹披拂疎垣
下微風與婆娑白雲自颺灑夜來山月生虛籟自
敲打

數枝猶翛然一枝出雲外天寒日光薄蟲沙莽萃
蒼何來食肉人對之形欲蛻虛中不可見涼陰沁
地肺寂坐枯樹旁意與煙霞會
荒荒劓此徑草草結此堂薜蘿製為衣桐實炊為
糧下士不許窺來者籍與康道深俗易侮內堅外
自甦養拙叢薄中隨風生低昂

耿介石同性蕭槭雲相依不知天地間何物甘癡
肥小鳥身向榮孤鳳常樂饑客途苦岑寂對之數
觴揮琅然起嘯聲無為徒噓唏

石屋

彳亍下危洞石逕曲萬端云是仙人居六月天亦
寒我來恣探討未覺衣裳單洞內濕暮雲攢雜飛
波瀾仙人未可見煙霞殊可餐

蠡山

蕩舟餘不溪繫纜蠡山橋桑林日未晏山路行非
遙長松八九株疎響聯如潮劍水漱寒碧冷冷玉

一條陡壁唬喧禽大壑來寒樵佳處茅可誅跌宕
娛昏朝攀登歷絕頂圭嶺雲迢迢鴻濛為掉頭洪
厓倘見招古墓何人墳滅沒衣襦消賢奸悲逝水
慨歎為長謠

管家山松雪夫人故里再疊前韵

蘿衣鬪為壁藤索橫為橋言尋管氏邨孤嶺飛雲
遙猶有青蛾眉秀絕迴春潮緬想林下風瘦玉敷
芳條百年侍松雪偕隱荒山樵身當宋元際吞聲
居市朝吳興清遠地孤榜煙迢迢我行若耶溪夷
光如可招溪山歷千禩不隨螺黛消難拋管家山

長哦白雲謠

白乳泉

兩足踏磽确終日凌山煙清泉照瑤席仙人悲逝
川留此一泓水地肺相勾連金沙披玉屑汲者盈
萬千石齒號驚湍澆灑多喧闐願言酌老月瓢笠
興悠然

西栗樹

鬪鬢西域樹枝柯拂石橋小雨潤藤索拮擊風蕭
蕭摳衣松迳滑拂面巖花颺根株互連絡蒼颯尤
矜驕芒鞋破塊北絡索橫相要初地焚辦香梵音

聆海潮晴曦射叢薄天宇清寥寥何當襍被來誅
茅依山椒

別山陰

晨起斟清醪花露色芳潔頽然望羣岫戢戢雁齒
列越女曉梳頭鏡光飛艷雪蛾眉相掩映紅霞互
明滅兼旬畫舫住銀蟾圓復缺訪山去荒厓弔古
搜斷碣稽山走送我鏡水聞嗚咽我今歸淮南知
作幾時別

與顧俠君

君前入剡時春波蕩綺縠遙峰青蜿蜒芳草茸茸

綠鼓楫下鏡湖夜遊時秉燭清詩如束筍剝藁塞
滿屋我今剡中歸殘雪散林麓小停訪戴舟尋君
半塘曲灑掃秀野堂冬缸酒新漉堂中足圖史清
華散林木撐腸五千卷插架三萬軸蟲魚細箋註
迅掃千兔禿相逢一笑粲共補山遊錄

秋聲

秋聲動天地風行極空濶風以助其威秋以肅其
殺天心戒萬物觸處怒號發初驚牕戶動漸覺林
木折孤枕雨聲中蒼波亦漸歇灑然涼氣至敲擊
簟簞節

九日大司農吉水李公邀同城南登高以竹
露閒夜滴松風清晝吹為韻

今晨天氣佳嵐光若新沐撰杖來城南憑高豁心
目愛此一泓水迴風蕩綺縠列嶂聳遙青平蕪剪
寒綠蘭秋值清暇解帶散拘束登陟如飛雲不藉
桃枝竹

沉沉易水波離離薊門樹黃葉漸辭林征鴻將首
路四序無暫停所歷已非故百年黃菊醜一夕幾
回御梢馬忽不怡商歌感零露君如不痛飲朱顏
豈長駐

繁霜易搖落百卉多蒼顏寒潭漸收潦餘響聞淙
潺叩須呼我友簔笠無往還豈不思利涉欲渡愁
艱難采采黃金花沉醉東籬間江天好風月輸與
閒人閒

大漠秋漸高寒煙滿川以故園望不見乘風思羽
化蛾眉老風沙那得娉婷嫁起舞氣激昂為君杖
甘蔗利鈍竟何常偶然策高駕且當飲美酒為歡
達良夜

夕雲鱗鱗吐晚天翠如滴落日色殷紅半輪啣石
壁野燒更斑駁雄虹雜雌霓了了見西山捫蘿記

前歷紛吾獨往願枕流還漱石裹糧擬從遊塵情
毋惑溺

今日龍山會飛蓋臨前峰天容何澄霽霧淡霜華
濃郢客蒨高唱清響搖寒松豁達簡末禮談讌欣
追從狂飲如渴驥一澆傀儡胸感公最愛士盡此
玻璃鍾

頽陽既西下皎月明天東臨流布瑤席何必張絲
桐兩手持螭螯揮盃送涼風蒼茫望關塞秋氣將
安窮睠彼唳雲鶴亦有孤飛鴻好尋劉白墮共醉
王無功

餘園詩金卷一
三
顧影菊花瘦照水寒潭清繚垣隔浦淑飛閣臨朱
甍寒畦半畝綠下見居人耕狐兔穴孤塚感此難
為情生前一杯酒身後千載名對酒且當歌浮名
孰重輕

我笑齊景公登山淚沾袖人生作達耳遑計百世
後復歎王子安詞賦莽馳驟落霞與秋水千年尚
依舊何如學阮公沈酣樂清晝臧否既不言頽然
指吾口

罷酒下高臺聊復張水嬉蜻蛉喚沙尾蹴破青琉
璃虛舟全不繫浩蕩隨風吹燕地水澤少擊汰此

一竒星芒翻上下濃霧光參差車塵感九陌擾擾
將奚為

顧書宣出城南登高詩見示和韵十首

秋水不盈篙秋雲裂幾幅昏煙惑前崗歸鴉遠難
矚風露淒以零寒條失故綠人外好陂塘空青如
可掬恬淡洗我心世緣靜榮辱葦花長於人宛似
蕭蕭竹

浩劫文字多叢殘惜書庫葢笈委泥沙寶函蝕風
露老蠹莽縱橫銀蟬紛觸迂太倉一稊米蠶絲自
抽吐傳世亦偶然苦吟爾何趣論古慨嘆生明星

燦如雨

綠醕既滿酌鮭菜復盈盤得酒且歌舞羈緒為之
刪口腹便老饕溪茶漱餘甘何節無羨景所惜無
人間儼從六一翁吟嘯環滁山翁歸客醉止車馬
沿溪灣

長身困藪澤羽翮誰見假遊心雲霞上垂頭塵土
下負劍從公旁永與牢愁謝清風羨無價明月照
良夜流水既洄潏闌花亦低亞此夕足千秋歡言
酌大筭

月華暈未闌蓮壺漏將滴隔院聞疎鐘琅然破喧

寂選言綺思裁隸事巧心敵交床互徙倚銅鉢共
敲擊敬禮工小文王筠識雌霓霓一時張我軍旌旗
屯右肆

大儒秉元化萬象羅心胸英才歸陶鑄琴瑟兼鼓
鐘羣公石渠秀干莫銛霜鋒堅白恣辨別合散連
橫縱公也顧之笑屢領搖寒松愧非延津鐵變化
將何從

搆厦始梁棟築堂先夷嶮清淑萃文江壁立瞻門
風賓從聚董賈棣萼皆嚴終左撫大宛馬右張繁
弱弓芝蘭滿堦除餘卉堪芟礧譬彼陳廣宴異味

兼魚熊

秦中昔遊讌絳帳鳴金鉦雁塔記登高山翠如霞
頽西京文物地儒雅紛縱橫含毫垂屣製韶音憂
鏗錡今茲繼高唱仙露霏金莖歸昌一疊奏霄漢
光澄清

穉郊獸正肥孳弓愛初設明當去無終射獵消白
晝渴飲黃虜血據地草痕跛男兒可憐蟲去住竟
何就辛苦死文字毛褐但依舊酒酣賦拍張起舞
為公壽

朝華詎足戀千秋以為期古處夙所敦猥巧將何
之願言秉金石肯受涼飈吹腥腐不可啄瑞露飡
三危酌君金屈卮湫澱難重持恪守循墻訕三復
風人詩

重九後一日陶然亭登高以迴潭石下深綠
篠岍旁密為韻

連朝挹秋爽觴咏偕郵枚更番出東郭騎馬臨高
臺高臺何所有登陟聊遲迴滹沱既東注太行從
西來手板自拄頰山川鬱佳哉孤亭峙林薄眺聽
無纖埃

葦花白如雪一水羅澄潭潭光漾古雪萬景無不

舍環以山碧玉映以天蔚藍古城出亭背老樹橫
相參與我同心人藉地聊清談喧囂性不諧荒寂
予所耽

九陌揚風沙天色不易碧開軒宛江南遠山何歷
歷疎林帶行騎隱隱露古陌繚垣瞰平蕪下見秋
煙直昔之登高人迅掃已陳迹臨風誦九嘆清響
裂竹石

駑駘困塵埃神駿歷九野吾愛黃鵠舉燕雀莫相
咤人生有儔匹氣味肯相假羣公同雅遊詞壇各
雄霸伊余雖曹鄒敦槃立壇下自憐斷尾雞不噉

牛心炙

今我忽不樂日月愁因尋修名不早立道路長寄
嶽朱顏詎常保白髮將見侵黃雞悲急景寒蛩多
苦音采采茱萸花沈嘆思不禁豪蕩恣感激覽古
余懷深

敗垣露古湫環湫龍所伏行地無波濤一水如可
掬豈其割左耳不然胡跼縮红柿露青黃枯松已
半禿古祠祀靈官簫鼓莽馳逐我且笑置之當門
看山綠

夕陽淨煙霾螺髻更縹緲雲煙驚過眼萬里一飛

鳥京華無勝地出郭便娟好四座羅觥籌清言雜
詼笑啣杯胡不歡余懷如食蓼我今比枯蓬那得
學霜篠

浚淵伏潛鱗穹昊仰豐翰高睨攀紫微卑棲溷鉛
槩浮沉分各殊枯苑亦易判焉得抗高標屈曲自
厓岍我亦有三徑不歸堪浩嘆使我如霜月孤光
不可盥

有車且載炙有馬且行觴詩人如猛士飲食聲渴
羌酒酣裂風景起舞意激昂坐無賈佩蘭誰為製
萸囊為君歌激楚歌罷潛沾裳且當學茗芋百歲

同風狂

黃花插敝冠空樽啣落日初月儼好女婉孌戀儔
匹斟酌墟墓間談諧愈親暱春秋兩佳節此尤不
可失諸君皆舊雨何踈復何密惟期守歲寒相將
底秋實

題望雲圖

山峰既雄拔川原覺幽邃眠牛偶一逢潭蟻自更
置橫山劈中榦神京此右臂瞻眺松柏情徘徊岡
隴意孤兒負土辰先公瘞玉地攀條神惘悵側立
心惴惴荒阪酒乍澆宿草淚新漬聞鶴萬里雲聽

鐘六朝寺憐君有至性讀書能繼志南陔身早潔
白華念已遂諸郎富頭角硤硤皆國瑞披圖為泣
然增予霜露思

宋山言索題鋤瓜圖

抱甕有佳趣荷鋤行高岡朝來微雨過古柳生陰
涼瓜蔓不可理摘之風露香殷地碧玉色注水盈
陂塘食新異時事溪老應不嘗日暮北牕歸展卷
住柴桑

小農詩

舊家銅厓下山田早春耕翳翳竹木繁澗澗流泉

鳴凌晨飯牛出襖襖東郭行逍遙越阡陌頰日啣
銅鉦蒲葉既已綠莒花尤洄潑如何舍之去七載
官蓬瀛有耳聽鈴索無復聆倉庚媯兒秀玉頰韶
頰霜蔗頰阿翁耨詩書辛勤已半生貽厥肯誤汝
農圃蓄令名願汝把鋤犁不願為公卿

玉堂松桂寒歲月捲穠籜掾燭日修書勲業無圭
勺仙蓬偕數子忍饑時作樂醜顏對高堂致養無
精鑿抱書空咨嗟曷不理錢罇我田雖蓬蒿我腹
慣藜藿何苦委筋骸日受簪裾縛人生有定分決
念返正壑一徑米花邨瓦盆自斟酌巢由泉滌耳

食園言金卷一
園綺芝盈握農固不樂歟面目無愧忤君家好男
子磽磽長頭角殷勤誥誥之勿踏平津閣

種秫南陌頭種樹東岡尾小麥抽青煙新秧點白
水秋聞穉稈風春吹榆莢雨蠶筐信手提漁榜隨
時艤田烏繞足飛鄉園無遠徙世路自屈曲隴畝
平如砥長年飯蔬菽差勝膏粱羨長年被裋褐遠
過紈與綺纂纂桑樹枝何心羨桃李但聞農家言
歡然露笑齒九卿起嗇夫朱邑我所鄙

同諸子飲菊花下

寤秋漉霜霰落葉如脫鞞采采東籬花耿介媚幽

獨對之飲亾何渴羗抵健犢未須士龍笑底用步
兵哭咄嗟聲利場諸君方庶鹿陶公顧之嘆三徑
有竹屋手撫無絃琴芳蘭在空谷道腴自盥漱明
珠傾萬斛熱客紛若螢秋士淡如菊華顛裂風景
庭柯已半秃不醉欲何為添杯水可掬鈴索少喧
囂毋驚鶴紉宿

碧山魚可焚青瑣綬莫縮平生早刊落善田與利

產用楞嚴

洒掃青玉案安用黃金璣多少折腰兒風

塵事手板我自背花去聽歌愛珠弗寶此潔白身
至理在夷簡今宵花前醉踉蹌越門限峯寄本素

志異哉點也撰塵沙苦昧人遠夢戀雲棧冷艷一
以親俗氛為之鏟我有巖栖友一瓢寄藤版李咸用詩

藤版岩栖漱石與枕流一洗人天眼

風霜既黯淡素髮尤颯蕭歲華一彈指攬鏡朱顏
凋空餘湖海氣直上凌紫霄凜冽景物變大漠多
蕭條惟有飲美酒磊塊可潛消枯蓬彌天風斷梗
衝驚飈窮猿何所之倦鳥將焉巢與君餐落英嵇
阮時招邀醉後吸長鯨滂渤如扶搖仙人籟雲來
咳唾皆青瑤始知顏氏子所樂在一瓢

劉節婦詩

金石有銷滅立志常貞堅可憐劉家婦鄉里稱豪
賢劉翁崙寄人作官珠湖邊劉郎溫飽士嬉遊堂
東偏陽春桃李花爛熳春風前以為免摧折可保
長芳妍誰知時勢異羅網紛糾纏劉翁貶官去劉
郎亦株連可憐劉家婦于歸無一年夫壻哭在途
寡姑哭在堂可憐劉家婦掩淚出閨房急脫紫羅
襦急却時世粧下堂理刀尺上堂調羹湯躊躇不
能寐嗚咽東方明

北風寒氣冽雪下白皚皚堂上翁與姑相繼遊泉
臺新婦中夜起行坐愴中懷夫壻知何方道遠難

與偕低頭乞四鄰軟語慰童僕相助送翁姑就彼
土中穴野田曠無路雪光蕩溟渤可憐劉家婦皮
肉凍皴裂一手拊白雪一手掩白骨

溝水東西流各自從清濁人生賢與愚所爭在好
學可憐劉家婦生兒具頭角兒生父未見兒長母
淚落夕陽下野田羣兒共力較皆言劉家兒門戶
最衰弱公然來欺侮對面相束縛兒歸哭告母母
急為扶持呼兒告往事淚下如梗縻自從汝父出
君家婦難為汝今不力學宜受羣兒欺送兒就外
傳受書歸書帷願兒熟孝經不願工文詞

秋蓬辭本根蕪亂無枝柯羈人患難後萬事皆蹉
跎當年朱閣秀今日窶人家荆釵挿蓬鬢憔悴難
光華日刈田中禾夜績燈前麻幼兒不解事索飯
聲呀呀阿兄門外來驚見生咨嗟
二
十載憤懣作歌告同仇紙上血淚漫夫婦在天涯
各各心腸斷

種花詩和夏重韵四首

跂脚北牕卧閒心時一騁招邀隔巷來愛此草堂
靜蓬鬆半闌花絲如髮垂領市中初買歸籬落成
俄頃長條與弱蔓位置已井井

青盆植柔葩黃瓷列嘉種正如蛾眉臨粧炫新
寵枯葢當雨後怒發亦何勇庭前草不除生意已
盈拱

離離暎朝日習習吹和風爭妍各有態浥露何其
工人情尚新異物理將無同轆轤汲井華奔走煩
兒童

花翁汝辛苦擔頭日不匱種花別花性賣花得花
利妖紅人易憐蕉萃汝輕棄我欲歸為圃先闢半
弓地古柳一兩株婆娑日三喟

隆教寺桂花

山遊逐峰轉步步挹空翠流泉繞我足松風吹我
袂却穿退谷西披榛露孤寺幽巖罨佛火金粟滿
初地几案多駢羅餅甕亦雜蒔一株尤娟好窈窕
黃雲綴光音發妙香不了一諦視餘者更紛拏綜
錯具古致翠葉生微陰謾謾涼雲碎黃色鷲子肪
曲幹小兒臂糝蕊繁於螢敷花密如織仙葩帶御
香人間偶然值落蕊不敢餐攀折更遭忌幽州草
木寒長養夫豈易石室冬氣溫泉流水膏膩老僧
工剪裁護惜夜無寐竒觀發空山香林迥無二迴
憶巖居時桂枝間扶荔百株實狼籍萬花尤縱恣

老幹皆臞仙比較此童穉兩年落黃埃歲月疾於
駛煙霞隔洞壑塵土浣巾帔今來古香中澣濯心
魄醉肺腑生清涼神靜發遙思孤亭聳遙青籐床
不忍棄歡然信宿畱山月晚相遲百年苦羈絆一
夕洗煩累桂蠹如可餐吾將與塵離

同人集棗東書屋分賦庭前花木錄存三首

垞南朝雨歇淨綠抽簷牙遲遲日卓午離離棗始

華豆棚多涼風餘芥落西家

棗花

寒裳向中澤紉佩來江濱楚蘅與芳杜綵繚若可

親采之不盈掬寄我山中人

杜若

朱顏不常保對此長春枝殷鮮來盆盎璀璨盈堦
墀臨風酒易醒盡此金屈卮

長春花一名醒酒花

李蒼存席上分賦得李夫人

卷卷庭前葉黯黯秋池荷繁華有銷歌往思如流
波中山損佳俠傷悼將如何嫖妍難重陳哀蟬噪
庭柯繪形甘泉宮巾拂猶婆娑佳人難再得慨歎
何其多精神默感名會合理則那少翁施狡獪合
殿如風魔鏡中失嬌面帳底來媼娥想像是耶非
不聞婉轉歌至今穉風客惆悵茂陵多

東方朔

我笑東方生滑稽誠有諸詭譎干雄主時與俳優
俱穢德以自隱辟戟時盧胡十五學擊劍十六學
詩書瑣屑數萬言昂藏九尺軀胡為但遊戲日給
騶侏儒觀其諫上林泰階陳六符宣室斥董偃其
詞非囁嚅嶽嶽殿陛間偉哉真丈夫汲黯愧不及
何有公孫徒乃知大隱人玩世與世殊三復戒子
篇柱下凜步趨龍蛇惟任運謀身有良圖夜來占
天文歲星今在無

送程姬田南歸

風埃紛鬱蟠川原莽回互但出青綺門即是江南

路送君歸江南情綜紛觸迂京洛十年遊間坊兩
人聚酒邊話夙昔歷歷見悃素玄都花爛熳劉郎
已前度才大偏軼軻祇應嘆遲暮中年重離別紫
髯總非故更事亦已多讀書豈不誤君今拂衣去
豹隱南山霧飲水戀一瓢縫衣愛大布宛浦三日
帆吳陵幾時住煙外廣陵濤窓中海門樹遙指新
安江已別西陵渡故園兄與弟團圞集郊圃

遊龍渚寄招民長又昭于宮

癡龍有遺蛻盤攫蒼山崦何年滙為渚大小依衡
瀾怒濤日搏蝕鱗甲尤修纖雲霞時澣濯塵土無

食園言金卷一
膠黏我來當早春一葉湖波恬遙山露修髻曉鏡
磨新奩忽焉矚竒鬼怪狀何昏憒猙獰逞毛髮烈
士初髡鉗稍窺下絕竇竒幻難盡覘柔滑如玉脂
洞戶青漸漸金仙隱其中服食最所廉瑟瑟雲掩
鏡淙淙水拂簾塵容自慚恧腥腐久已歎裹糧思
從遊未暇營蘼鹽包山富洞壑敞邃此地兼寄招
三詩翁玩弄吟春蟾還尋小西湖同上縹緲尖

題春雨草堂圖

故家駘喬木古水蟠蛟龍披君草堂圖使我思盧
鴻堂中老仙人著書學王通一幅古冠巾避世貌

何恭曼行蝸牛廬長愛逍遙翁亦有陶通明庭院
哦松風北窓跂脚卧時時方兩瞳東海日栽桑北
山拋短筇一徑桃花源穀紋磨青銅洞中吠雞犬
疑有漁郎踪當時俗淳樸年歲尤和豐里俗敬儒
雅門戶無鬪攻先進標風格一嘯驚鴻蒙絲竹時
陶寫賓客填房櫳青芻與白飯早韭兼晚菘日有
衣冠會蔚為淮海宗仙人去已久遺書待所衷轉
頭四十年甲第高龍嶽膝前多才子聚散同萍蓬
憶我丫髻日此地時游從漁魚羣下水敲石齊登
峰三月修禊事九日問菊叢君家諸年少痛飲玻

館園言金卷一
三
璃鍾樽前黃縑綽座上商玲瓏落索箏琵琶急景
何匆匆競將劉白墮醉倒王無功當時樂莫樂睡
味松根濃覺來西山寺彷彿聞晨鐘前塵與影事
思之傷情悰與君聚邸舍策策雙梧桐展圖逢舊
識細雨方濛濛圖中雜花樹依舊堆青紅湖山不
歸老老鶴畱樊籠浮名多誤人有如送雨虹狂斟
秋露白一澆塊磊胸

題溧陽溪山圖

平陵好溪山宛如錦繡谷翠色接銅官地肺連勾
曲一泓洮湖水秀奪鸚鵡綠浮花繞縣門清折穿

林麓江臯有奧區煙霞森石屋客到雙橋西支筇
看不足

數峰青未了盤拏意飛動春暝宿雨餘草綠如么
鳳落日不逢人溪聲管迎送

風氏園旁數武有武家窰與黑龍潭相對水
木清華渚淑環互風日澄霽宛似江南癸
未甲申間時從興化總憲往遊公身居廊
廟性嗜煙霞將於此移築廣陵館以為登
臨之地未幾仙去俯仰之間頓成陳迹丙
戌秋杪同人復集此地悲從中來罷酒不

懌憑高南望有淚沾裳諸君不知以余為
酒悲也歸來燒燭成五言古一章

近市厭苓通退朝憐馬汗謝公具閒心不受簪裾
絆南臺偶清暇幽尋巖石畔蕭然淡容與解帶一
笑粲古水如車輪遙山列屏案薰葭秋意冷魚鳥
煙汀散用洗塵土腥掬水自澡盥卜地將誅茅高
處置亭觀厨中阮公酒林下嵇生鍛寄託有閒情
壯遊正汗漫何意竟騎箕海山歸夢斷萬人悲莫
贖百歲甫過半夜臺妖鳥叫西日黃雞喚山丘今
已矣淚落如珠貫彈指去來今恒沙劫難算支筇

一憑弔陡覺星霜換沈潭蛟蜃徙荒樹狐狸窺倚
闌思往事世味若冰炭風蟠吹寺門苔莎繡井幹
罷酒不成歡歸途意淒惋

同熊東湖陳緘齋六觀周桐埜諸前輩遊萬
泉寺

軟塵不可掃殷地風埃紅意行出東郭偶與泉源
通何人疏地肺橐籥未可窮一奩波淡沲瑟瑟磨
青銅水田如井字錯疊圓鏡中煙靄燦巾拂水木
明房櫳恍然煙江外黃篾搖吳篷與君苦煩熱熏
灼愁沙蟲今朝地上望十頃玻璃風西偏給孤寺

逢僧談苦空，濁泥見漁父。眠柳來鳧翁，塵土已迅掃。但有山巉巖，人生適意耳。此景毋匆匆，不爾困羈馱。野鶴留樊籠，歸途漸曛黑。蹀躞乘花驄。

陶齋同諸子論文偶集

霏微風日佳，曠放天宇淨。清言足忘倦，揮麈對西嶺。雲流苑樹動，露下巢鶴醒。蘭煙方藝案，麝火恰明鼎。啣杯樂清適，吮墨鬪新警。鄙才最真率，野性本孤迥。十年來京華，未敢違素秉。觴詠愜殊趣，植論得要領。人生介有定，利鈍敢馳騁。以茲寡所營，高卧蓬門靜。願言弼文治，玉衡粲東井。

和陳絨齋前輩集飲熊東湖學士齋中原韻

碧山有佳築，亭榭尚樸野。竹石既明淨，卉木尤和雅。微雨曉來歇，巾拂一霑灑。先生大隱人，跂脚北牕下。竭來共斟酌，羨酒如泉瀉。溪友贈蟹螯，園官供菜把。九衢瀕洞塵，袍袖不縈惹。吟成金薤篇，就君柿林寫。

種花再疊前韻東絨庵東湖六觀滄洲

買花向斜街，靚粧臨藻野。葵蓼何繽紛，惟菊最閒雅。密移香塏封，勤使清泉灑。婆娑石砌旁，位置竹籬下。安得盈樽酒，與君共傾瀉。堂堂復堂堂，歲月

食言金卷一
不堪把胸懷如轆轤棖觸還縈惹及時且作達對
花日吟寫

滄洲疊示近詩三疊前韵贈之

避世金馬門漁樵孟諸野心跡兩合併被服更儒
雅陳君起湖湘天骨最瀟灑詩歌繼國風豈出楚
騷下蒼茫萬斛泉珠璣自傾瀉正如棟梁器不復
珍拱把直廬冰雪清秋高雲可惹三復湘中篇我
心共披寫

九曲亭

下有吳
峴

松陰樹若薺猿聲噉天外危磴搆新亭迢迢似車

蓋傳聞紫髯翁爭霸此江介鑿山過竒師曲道相
鈎帶石骨叢嶙峋枯槎疊旌旆登頓眺西南江空
水雲滙日落煙景昏風煦春初泰人同鴛鴦侶詩
爭鸛鷺隊青蒼儼石門明瑟疑巖瀨千秋奪險處
空復雲靉靄相携訪芝朮披此南山蒼

春夜同徐壇長登黃鵠山尋梅達曉歸坐山

堂用壇長洪山紀遊詩韵

孤月既瑩然角聲亦悲壯竭來夜已午枕手憑欄
望雲邊山黛隱空界湖波漾早衰腰脚軟登陟須
用杖樊籠解羈紲耳目得清曠梅香沁肝肺造化

有心匠人生儼夢寐茲遊亦清暢三年湖南北萬
事付孟浪忍饑且誦經安用漁樵餉殘山及剝水
攀躋空想像一峰如鵠舉終日屹相向露寒藉草
罌烏烏發高唱曉色開東瀛天門方蕩蕩鶴唳九
霄中雙翅已大放老顛裂風景惜不傾家釀孤亭
對大別突兀送青嶂山靈應相許蒼茫吾意王回
頭謝簪笏興已寄霞上

丙申臘月二十八日雪中同壇長寧先綱齋
登陶然亭携酒過風氏園偃松下留連竟
日余口占起句歲暮小除夕雪中看偃松

及歸邱舍塵事縈心未續成篇庚子正月
壇長訪余鄂州使院出偃松詩見示仍用
余起句時寧先在京師綱齋奉使至安南
感事懷人依韵奉和

歲暮小除夕雪中看偃松長安三尺泥誰復尋酒
雄冰花粲長虬雪片堆卧龍但悲時跼促那玩天
瓏璫幸有素心友竭來懽賞同聯鑣往南亭載酒
披榛叢轉眼已五年倏若風颺蓬參差雁鴻影滅
沒麀麇踪偶然成聚散未可論通窮蕭蕭感華髮
泛泛凌長江乘風剪秋水把卷歌船蓬浮湘波嫻

嫋望嶽山童童寒光日吞吐倒射玻璃缸黃陵過
 雪夕馬耳明尖峰十日洞庭險常恐埋蛟宮喜聞
 故人來昨夜燈花重山亭足煙景春色搖簾櫳談
 心瀉卮酒不覺鳴晨鐘餘酣出新詩整暇如軍戎
 清華邁東阿恬雅超文通為憶舊遊侶指寧趨走
 京塵紅王人使南國時綱齋出使安南將抵武昌象郡回春風
 豫擬十日畱同眺千芙蓉清雲動吟筆白月開茶
 籠試問魯南叟何似眉山翁

秋日今年集寧先寓齋送坤掌南歸以雲淡
 水容夕雨微荷氣涼為韻得夕字

井梧辭故枝朱荷卷將夕空齋塵慮屏忽聞疎雨
 滴送我同門友別思紛如積聚散若萍蓬繁憂不
 可釋秋風昨夜起砧杵催刀尺居人與行子擾擾
 為形役歸經汶陽渡返憇泗濱宅田父候柴荆羸
 駮識巷陌脫然簪組累快意林泉適澄懷知味道
 所守尚貞白塵中滯留者清樽感離席三徑綠蕪
 生曾見君行跡

餘園詩鈔卷一

餘園詩鈔卷二目錄

七言古

吳義民詩 并序

房中詩

打麥詞

采桑詞

射鴨詞

采茶詞

唐賢劉又先生脩養詩頗有真諦余苦其未
的演成此篇皆就道理中言非若韓潮州

改玉川子月蝕徒論章句也

孤鶴行

朱蘭曲用李太白韵

葯房山茶花春暮始綻余傷其晚而喜其不與凡艷相競用鈍翁韵

卓鹿墟話錢塘江潮之勝石郊有詩和韵

夢與東坡言芙蓉城事甚悉坡公曰余前詩

掛漏甚多醒時追憶其語補之仍用原韵

塘上行用青蓮憶舊遊韵

後舞燈行

偶同諸公即席拈韵限曲度一闕各成長篇以此曲共三十六字故

成三十
六句也

焦山僧葺山志初成索予題句因書卷尾

小至登蔣山晚憇靈谷寺用李北海荆門關

韵

長至日懷芝山先生再疊前韵

觀音巘望雪三疊前韵

北墅雜詩為高江村宮詹賦

冷泉亭

慧山第二泉試武彛茶歌用商止先生韵

舟次玉峯偶感傳是樓往事再疊前韵

薄醉望鏡湖諸山

晚登會稽南城望秦望山

三山訪放翁故居

黟山松

若耶溪懷古

畫舫聞歌篇

鏡湖放歌

晚遊曹山

登蘭芎山望海及三江入海故道歷歷在目

用商正先生華山韻

泛舟柳姑廟

鮑山

青衣泉

贈花田先生

踞酒石歌為頌花田賦

踞酒本元次山石魚湖詩

歌帆石歌為頌花田賦

藏經匣歌

為同年李牟山賦

淮陰詠古德州田公座上小賦

袁術

陳登

蕭望之

枚乘

馬宮

孟喜

嚴彭祖

小忽雷歌 并序

樓村夢至一處梅花滿庭一老人以杖數樹

云此十三本以付汝覺而屬禹鴻臚尚基

繪為圖今欲南還以圖索句作歌贈之

答王竹村九日見寄同顧書宣賦

題悔餘證因圖

題相馬圖

烏獬豸歌 為宋商正
太宰作

送商正太宰致政歸里

奉題大司寇新城公荷鋤圖 按帶經而耒出
漢書庚辰夏公

有御書帶經堂匾額之
賜因命禹鴻臚繪此圖

題李蒼存秋穫圖

題顧俠君嗽荔第二圖

大觀太清樓二王法帖歌

跋瘞鶴銘卷尾

倚韵答劉太乙張日容

題維摩居士圖

再疊前韵柬友人

說北食三疊前韵

李蒼存南歸索余後圃講堂詩賦此贈之

題晴川秋望圖

擁青閣讌集分得簫字

飲酒

題李天山鑑湖垂釣圖

題汪玉輪修撰秋帆圖

送劉豹南侍御視鹺河東

東籬詩為趙价人作

題安溪先生家難詩後

遊萬泉寺

庚子上巳後六日泛舟樊口作

臘梅

餘園詩鈔卷二

男集琬校字

亭間繆沆澧南氏著

後學

沈德潛

金志章

編輯

七言古

吳義民詩并序

稷山義民吳伯宗世為農民弱歲喪父母
兩弟俱幼相依一日其少者忽為人所略
賣未幾其次者忽又失去伯宗行求之十
年餘皆得之晉多孝弟力田之夫其猶有
唐堯虞舜之遺風也歟如伯宗者豈非其

人歟為作稷山義民詩以告世之為兄弟者

有弟有弟在巴巫天寒日暮道鬱紆山如劍鋸路
崎嶇瞿唐三峡妖鳥呼十年不得平安書義民思
弟行踟躕巴雲茫茫百草枯欲尋無計空嗟吁誰
知相逢在上都憶昔一母生三雛虎兒墮地雄於
菟亭衣繞膝伯仲俱推梨讓棗為歡娛可憐轉鬻
遭髡徒痛定思痛心何如兩人相弔形影孤有弟
有弟醫無閭漆身吞炭依穹廬朔風如刀割飢膚
馬通熱火延頭顱自甘沒齒為人奴義民義激思

首塗寒江欲渡乘無桴嚴關欲過軍無符狐裘不
煖雪片簷何況單衫遮骭軀含情無語泣路隅佃
田聊復為輸租始得伏匿藏單車渠魁據窟同負
隅落身陷穽非良圖陳情憲府走檄拘弟兄血淚
霑衣襦鞞刀帕首雖睢盱義屈不覺詞囁嚅玉關
生入行安驅一時高義傳通衢至性純篤愧小夫
客言庸行徒區區吁嗟庸行今已無

房中詩

嬌兒衮師繞案長文如翻水聲琅琅夜堂篝火攤
書讀吹落燈花紅簌簌小者玉頰好眉宇手持梨

會園言金卷二
粟能爾汝中男依兄望短檠毛詩新讀一半生山
妻椎髻夜操作手弄諸雛共笑樂頻年踪跡隨天
涯賴汝黽勉能持家不為楚相君勿哂與君相偕
廉門隱

打麥詞

小麥雙歧如燕尾大麥叢苳如馬鬣黃雲遍野麥
齊腰暖雲四月飛黃蝶鎌刀霍霍割上場連枷齊
打堆連墻紛紛落磴白於雪飽喫今年餅餌香

采桑詞

頭眠蠶起碎切桑二眠食葉聲滿房三眠將老食

轉急青裙犯曉提筠筐桑梯高高桑鈎短女桑葉
盡樓桑滿蠶絲百箔樹頭鳴催買桃漿賽蠶館

射鴨詞

家鳧拍拍雙翅重野鴨花毛似花鳳泛浦行沙唼
喋遊水鶴孤翹驚不動鳧羣肥澤鶴癯然脰長脰
短全其天桃弓放弦箭撒響一時決起衝雲煙

采茶詞

一旗一槍芽尚小兩旗一槍芽已老官符未下催
頭網穀雨登山猶少少鶴園名品茶最多雞藪不
如虎膝窠野花山葉簪頭鬢結伴采茶齊踏歌

唐賢劉義先生脩養詩頗有真諦余苦其未
的演成此篇皆就道理中言非若韓潮州
改玉川子月蝕徒論章句也

損神終日談虛空數竅不如退守中精微可西亦
可東紫霞飛處煙何濛自起自止焉知風若存若
亡曰冲冲世人識萬不識一寧知一入還一出只
知一切望一切不覺一日損一日勸君脩真莫認
真由来忤人非道人黃茅白雪益亂神此法那能
堅此身此身無一不可珍惜哉自有不自親此身
何日離埃塵吁嗟乎此身何日離埃塵

孤鶴行

暝煙惑砌粗蟲號明星的爍天宇高玄瞳朱頂身
潔脩戛然長鳴雲氣凋一回宛轉一嘆息餐霞能
療人飢瘠自從侵染紅塵深不復幽棲珠樹林嚼
煙吐火心嘗恧水碧山青地莫尋羽毛峩峩玉光
擅迴風自舞如圓電昔人寧死不乘軒前路雲深
可受箭馴畜時慚波上鷗譏訶一聽籬邊鷓鴻飛
冥冥絕點塵孤鶴對之心欲焚徘徊四顧仰高旻
月明無路從湘君

朱蘭曲用李太白韵

曷不居名山而乃在樊工曷不持碧玉而乃妃珠
樓殿繁瓶盎夫何為曷不返作湘粵遊遠遊休逐
羅綺傍赤雀錦舌森開張丹鸞振羽搖紅光依然
王者稱都梁氤氳氣鬱相望露濕朝霞射點蒼
嗟爾爛漫拘方幅紅冰啼盡雲天長雲天長在迷
悶間夕陽紅多夢未還陳夢良呼趙師博相顧不
得歸故山夕陽紅陳夢良趙師博皆紅蘭名我為朱蘭吟愁為朱
蘭發低徊孔操亦自傷徘徊夔植苔猶滑嘻吁噫
休道幽花不世情子山射策羞蘭成朱絲彈罷無
一賞珊瑚影折思瑤京願附木蘭歸七澤香染春

風雲水清

葯房山茶花春暮始綻余傷其晚而喜其不
與凡艷相競用鈍翁韻

絳紅一捻盤層簾醞釀殷紅半宵熟赭顏如火足
清娛剗殿春風此花獨色丹葉厚吐清霞珠光漱
灑金仙家稜稜犀角發殊態遲遲春晝無人譁物
理由來細推究敷榮莫如晚者壽梅花墮地梨雲
飛糝綠繁紅中一覲幽葩小院吾與爾茶熟青甃
滌冷齒却憶滇雲爛漫時瑪瑙碎剪碧霄裏

卓廉墟話錢塘江湖之勝石郊有詩和韻

錢塘江潮奇莫比卓生語我曾過此山高高兮風
泠泠忽然一線渾澈底忽然圓身破磴氣忽然地
肺幻奇傀忽然縱橫繞匹練打落蛟綃失復起山
前山後珠璣游雲車鬼馬無停晷觀者駭目自動
搖聽者洗耳側源委予生東海苦寂寞山水幽情
窮入髓墮地即欲遊天邊二十抱甕何為爾青衫
誤人真可笑有似急雨摧鮮蓋有似狂鷹械垤澤
有似號猿陷崩崖逢君抵掌說江濤有似平田設
壁壘明年買棹錢塘江準看江流浩浩布帆駛擊
鼉鼓吹瓊簫小巫舞蹁躑大巫聲嘈嘈同來江頭

攀素車笑爾怒氣至今猶未已錢鏐王今安在哉
萬弩誰人發硬矢

夢與東坡言芙蓉城事甚悉坡公曰余前詩
掛漏甚多醒時追憶其語補之仍用原韻
芙蓉花開香青冥城中環珮聲東丁美人影入珣
璃屏衣衫颺縵光娉婷紅綃萬縷花煙青花枝歷
碌鋪繁星浪言服食能鍊形雲路千層誰所經荒
唐此地棲真靈蒼虬導入驂雲駟或云主此石曼
卿四天玉映花芳馨觀文幾魯歸紫廷恐是浪語
朝士聽流傳遂曰帝所令城中設置何軒櫺臨霞

會園言金卷二
六
悵望不可憑丹樓漠漠風清冷丹樓失鑰夜不扁
瑤英偷入騎鸞翎丹砂鍊就驅雷霆歡攜子高望
中亭玄猿白鹿可結盟美人三十歌鈴嬾丁公吐
語風觸鈴延年倒卧醉未醒夢中絮語方吟噀牀
頭倒繫雙玉瓶百日易過淚欲零塵埃一墮罡風
腥素騾恍惚嘶空溟道逢東坡訴颺萍恨不長年
守黃庭下士瑟縮如焦螟且飲美酒為延齡莫恨
孤凹與絕邢

塘上行用青蓮憶舊遊韵

陂塘髻挽三龍上天持翠蓋遮我樓傾來明珠一

萬斛蘸水便欲欺陽侯何處白鷗作閒客煙水相
遭風不逆比翼扇子颺溪紋論價荷錢幾曾惜昨
夜芙蓉開兩枝輕彈紅粉慰離思思之不可見香
夢空相隨夢兮本住芙蓉城繡衣錦帶絲縈縈加
以千絲萬絲雨一絲一絲颺渺聲岸頭步障低羃
歷如船紅藕來親迎迎之以雲璈迎之以鶴笙鴛
鴦靜無語鳧鷖何能鳴迎仙曲裏仙雲舉颺蕭垂
手大小舞誰把彩雲鑄我魂頓使筆痕化釵股擲
筆醉魄凌煙霄星辰雨雪如初朝聆清音兮天路
遙攀揭車兮返舊巢何人擲杖兮重為橋前宵塘

下賦艾虎意氣雄於孫討虜但識當筵布錦機那
 知繡腸縈繫苦今宵雨過碧池深斜陽紅漏千黃
 金哀絲豪竹輕霞捲如水空簾淡蕩心心情猶向
 蒲塘曲霜綃涼沁明於玉蓮影裊空絳斗移桃笙
 曲展雲光綠返照依稀掠鳥過徘徊其如明月何
 三倚闌干心不改應許冰心托素娥素娥裊裊雲
 葉輝露華豈惜霑人衣衣上有香不堪洗化作蝶
 粉空中飛此際知音寧易遇漫云易買長門賦武
 陵之漁不可邀孤舟鴨扎煙中去煙中去恰逢君
 香醪豈肯戀芳羣未解贊夏酒曾熟榴花墜火徒

紛紛紛紛人世那可極年年荷花香裏長相憶

後舞燈行

偶同諸公即席拈韻限曲度一闋各成長篇以此曲共三十六字故

成三十
六句也

陽烏落盡參旗平珠海七寶非哉生沈沈龜甲菴
 香夢乍透湘簾一片明明粧隊隊列西第長袖窄
 靴爭妙麗一聲羯鼓穿雲煙數行彩燭流高髻盡
 擁鯤絃唱渭城琉璃如水照歌聲神女峰前雲欲
 落洗頭盆下夜初晴乍看燈影層層奪恍若迴風
 舞春雪尋春陡見洞門開屋梁盈盈古時月玉簫
 吹起艾如張舉袂拉雜疑星芒水晶田映三三徑

白玉釵凝六六行遊龍驚鴻轉香霧采鷁飛來看
競渡隨風上下紛晶熒繡錯湘裙多却步錦綉綺
褥宵煙紅秋波銀燭相玲瓏投罷柘枝搖火樹更
番白紵倚薰風研光片地穉瑜滑鳳脰雙霞憐翠
襪驚聞屈戌走微香澄鮮驟現芙蓉塔今宵百疊
渡銀河萬轉千迴舞態多為語司介停彩箭別思
依依托綺羅

焦山僧葺山志初成索予題句因書卷尾

三山一氣青蜿蜒峭帆擘破空江煙數聲漁唱隔
晴碧夕陽杳森聞扣舷菜翁花田先生逸興何軒軒振

衣直上秋樹顛漫山紅葉絡碎錦青黃雜糅波中
天蝸牛廬中草芊綿望聽江水鳴濺濺我擬將家
傍巖住焦公祠畔容醉眠雷轟古石留厓邊八行
遺墨當時镌馬鳳笙今何處所女郎佳話千秋傳
石上有鳳笙題名前塵影事空憂煎不到此山已六年寺
門行過雙淚落天香主人今已仙癸酉秋侍先君遊於此茲
遊悵惘空迴旋名山一日難延緣亭船欲別不能
別一江秋月流娟娟

小至登蔣山晚憇靈谷寺用李北海荆門關
韻

痴龍盤結氣悠悠振鬚豎尾騎五州蜿蜒跂跂有
萬曲紫鱗灑空排鐵鏃千年王氣已銷除攀髯尚
伴軒轅宿隧道平蕪亂草生古松數株麋鹿鳴金
床玉几盲風起平臺不斷御溝水白頭宮監語支
離開門款容荒陵裏碧瓦凋殘冷炊煙穉谿雉隴
羅平田行人近前面顏熱難辨橋山一真穴翁仲
雲深蔓草寒索駝背腫象齒折晚出紅墻陟亂山
塔鈴風寒僧掩關聖水寺前靈谷路八功德水移
來處空林葉響琵琶聲伎倆狡獪人仙去昔時藩
衛帝王家今日頽敗荒山涯

長至日懷芝山先生再疊前韻

陽烏振彩光悠悠疲驢偃蹇來南州古槐盤挈枝
拳曲斲爛霜華白於鏃過江率同樂令遊歡向蕭
齋淹信宿莽莽離緒如草生九霄潔鶴時飛鳴宵
闌中酒推衾起黃梅僵落銀瓶水冷淡為歡記昔
年吹葭賦就西堂裏寒雨孤舟黯夕煙歌筵客散
趨平田狐裘茸茸肌不熱君遊帝城我土穴懷君
有夢到東華十丈軟紅鞭影折兩年彈指隔燕山
玉堂清興最相關宮樹迷離苑西路子京椽燭修
書慶明年也擬到豐臺從君歌帽看花去重沽易

酒醉天家荷風槐雨樂無涯

觀音巖望雪三疊前韵

空山雨雪清悠悠江螺亘天如大州絕壁崖紫形
結曲苔衣石髮森斲鏃娑羅樹老劈壞肌荒荒只
就痴雲宿碎珠滾空玉屑生老鼉縮項窮猿鳴行
人踏雪拂衣起轉過峰腰憇古水毘盧樓閣聳華
嚴題詩深坐佛燈裏雪濤拍拍寒磯煙江尾橫遮
一楞田古洞週遭地肺熱斷厓頑石誰穿穴聖僧
寂坐雙趺垂石鼎霜歌一脚折橫披鶴氅來登山
泉翁若墨妙留天關臨霞欲訪攝山路七年曾此

幽尋處香泥滑滑雪蓋頭恨不身隨飛鳥去角里
韵事看浮家曰歸不歸戀水涯

北墅雜詩為高江邨宮詹賦

江村草堂真畫圖山雲繞徑無時無前過蘭渚小
略約夾道碧梧千萬株高館逶迤石梁下瀛海蓬
壺此其亞梓花紅映珊瑚鈎花開時節吾來遊
泛綠亭空陂水廣樵青漁童雙蕩槳問花載酒時
往來風起銀鱗墮纖網小山陂陀白雲麓古松盤
挈頂俱禿松花吹墮來禽坳枝頭翠羽聲交交
日光墮地青漾漾一夜雪花大於掌朝來雪消聞

暗香尋香乃在梅枝上姑射山人冰雪姿鈎簾望
對橫斜枝鶴聲響入修篁谷竹光掩映鬚眉綠

冷泉亭

四角孤亭坐石齒清泉噴薄飛花蕊松黛參天閣
白雲一泓新漾空無底窳稜寂寂流淙淙夕陽倒
插金芙蓉冷翠層層上衣袂幽人踏遍空林鐘

慧山第二泉試武彝茶歌用商工先生韵

寒泉九曲夢未到瑞草一束叢生巖氣蒼味厚色
轉樸雪煩驅滯心為快廟山蘿芥苦柔媚配此風
格方相兼閩僧前時裹寄我日夕蒸焙誇茅檐行

纏南沂不忍棄驅履白屨標紅籤竭來試茶山水
窟獠奴翦葉勞包緘松響颼颼風鼓浪泉音琤琮
水拂簾雲垂綠脚滲遙碧香浮翠乳凝空嵐泉清
石白正映發夫豈尤物橫砥砭從來萬事尚標格
咀啜至味無人探斯水煮茶合第一虛評浪語空
譏讒是時山空巖骨露一塵不動含晶鹽餘甘漱
齒喉吻潤恍在武曲搗吟髯胸中腥腐滌欲盡茗
柯妙理搜叢談

舟次玉峰偶感傳是樓往事再疊前韵

北風巉峭落沙嶼南帆偈仄迴高巖馬鞍山色醜

食言金卷二
眼碧刻劃寒翠意最快當時長句我愛讀筆力韓
杜能相兼只今雒頌未忍釋痴如凍雀蹲寒檐具
區浩浩若奔馬玉峰戢戢如攢籤不愁兩手泝泝
統一囊破錦親縫絨哲人萎矣典刑謝空餘萬卷
堆湘簾千秋茫茫孰傳是精靈宵冥煙銷嵐鑄金
繡絲念未已蜉蝣乃欲橫相砭騎鯨大去返碧落
仙山樓閣歸重探憐才一念足不朽文章萬古為
雪讒芥薑之性老愈辣肯以白酒堆甜鹽感公遺
事只嗷嗷皸瘃兩手掀松髯詩成鈎棘不娥媚經
倉瑣事聊評談

薄醉望鏡湖諸山

一晌凭闌悅心魄濃綠煙鬟掃空碧誰把千金買
畫圖張我溪南雪色壁剡東剡西住亦佳霜晴月
皎無風霾酒醒忽憶子敬語秋冬之際難為懷

晚登會稽南城望秦望山

天星照水光銚銛林樹壁立張紫髯香爐一峰更
峭拔裊空突起尤修纖飛泉一道見沸白冷瀑淙
淙破山腋觀者骨毛為凜凜疑是沈潭白龍脊

三山訪放翁故居

半生愛讀放翁詩心太平庵未能訪曉來折葦去

三山橫陂水涸江銷漲竹林谿斲空敗隴嶺路青
冥隔層嶂逢人但問柳姑庵龜堂未到神先王一
抔遺土冷雲根蘋蘩果有邨翁餉當年艇子出無
時束書裹酒肩扶杖堪憐欲盡已無人後世考詩
空意愴風流歌絕五百年陸村之名傳亦妄故宅
無存僅土壤振興更向何人望萊翁振筆為摛詞
含宮爵徵音諧暢花田先生大書故宅表渭南豐碑嶼
嶼雲霞抗碧霄他日鶴歸來並邨好畫癯仙樣

黟山松

松針茸茸密於篲針長無寸柯逾尺翠皮青黛歷

千年枝作虬攢根似石摩娑知是黟山松雖落塵
埃具標格我聞松在黟山時鍊雪烹霜匪朝夕蒼
藤陡壁恣盤挈白鹿玄猿忘主客拔身萬丈聳煙
霄化身萬億迷峰脊鬪鬚時聆樵士歌清蔭亦照
仙人奕幾經地老與天荒崩厓一綫何人坼匆匆
荷擔出山來輪囷有似瑤星謫我曾愛松具竒賞
心似孤松拘青碧市上閒行得此松小拂龍鱗愈
光澤香泥綺石護雲根青莖栽向嵇山陌噫嘻此
松流浪天地間不遇我曹亦可惜

若耶溪懷古

赤堇山前波瀲灩晴峰無數啣山店日暮溪風黯
淡吹有客重來訪遺箭樵人不逢鄭巨君寒磯罕
見仙公面上有葛孝先釣磯晚登鑄浦弔歐冶灼灼芙蓉
經百鍊蜿蜒立佩五蛟龍出入風火森巖電當時
吳兵入會稽提鼓行成幾爭戰純鈞湛盧空自好
魚腸巨闕安足銜不若夷光初進時吳宮荆棘生
釵釧沼吳只在如花人多事越王重鑄劍

畫舫聞歌篇

晚煙化水光沈天玉塵冷冷塵外懸涼月瀉地衣
裝棉拒霜花開香清妍繽紛歷落羅芳筵羯鼓一

聲足不前音情拉雜如摧堅隆隆轟轟何因緣鏡
箏琶笙空中闐如有萬派飛來泉又如萬騎飲長
川衆賓目瞠相流連餘音一縷凝湘絃法歌豈是
人間傳依聲按律清且圓聲沿板定尤踰躑韻三
字七清可憐少頃客散朱闌邊飛觥射覆紛盤旋
三絲三竹響後先急攢冷點聲萬千凝神如讀秋
水篇濠濮之想時有焉金貌香燼獨兒眠此夜願
得長如年一黍一粒審音專南曲既終北曲捐老
顛狂叫張空拳哀吟失職自古然聞歌更覺情糾
纏意欲從此耽枯禪未許塵埃呼謫仙崗南寒草

何能芋往事真如過眼煙小秦淮水尤清漣舞衣
和月載一船再請卜夜恐未便

鏡湖放歌

我聞南湖三百里天晴湖面堆青瑤溉田一萬九
千頃芄芄黍麥兼嘉苗有功斯土馬太守祀典百
世胡能祧厥後四明有狂客詔賜一曲嵇山楸干
官祖餞趨歸隱寵以宸翰光中朝會稽司馬日載
酒嘹唳玉管紛瓊簫劍南陸游此歸老卜廬湖畔
窮昏朝投荒萬里返故國風塵馳逐朱顏凋道士
莊前調白鶴柳姑廟後停蘭橈此湖自落放翁手

江山壯觀未寂寥西風陡峭鏡水裂曲港冰合寒
魚跳三兩詩人弔芳躅千秋古觀風蕭蕭劇憐鏡
水已非舊湖田侵蝕生蓬蒿白塔洋前一掬耳蕩
漾無復迴春潮今我来遊值歲暮一輪皎月橫煙
霄狂客不逢放翁死湖山勝地歸漁樵興酣偶然
作三弄羽衣玉立誰相招

晚遊曹山

日落樵風吹五兩鏡湖濺濺鳴細浪木蘭雙槳泝
迴波水態雲容樂清曠須臾已至曹山前鰲擲鯨
喙不可狀谷簾瓔珞勢交環飛棧崕岬屹相向孤

舟棹入無底壑其上巉巉插青嶂人行壑底與天
通水漱山根驚石漲撲人白蝙蝠共飛翻激刺銀鱗
還擊撞神房阿閣現眼前博戲金仙爭跳盪客言
胚腓初乍時五丁鑿鑿手親創高掌遠蹠渾生成
此語相傳不無妄當初越王採山石泅水淵淪煩
巧匠崖谷都留斧鑿痕狀若甌甑陳脯醬我舟昨
過鳥門山邪許聲喧崖萬丈其下轟然儼雷鳴其
上啁啾如呀吭石乳點滴滲旁溪鷺兒破殼酥流
盍千年穿穴有停時即與曹山同變相犬亭鼉屨
白雲中躡捷峰巒穿篠蕩山深路黑崖岿危步步

天風防跌蕩趙家陵寢隔煙蘿冬青樹老無樵唱
興亡舊事莫沾襟且歸畫舫傾新釀

登蘭芎山望海及三江入海故道歷歷在目
用商工先生華山韻

東行會稽探禹穴芒鞋日踏千峰巔曹娥廟前小
延佇戢戢放溜梁河船馳坑跨谷興未盡天風吹
送蘭山前訇然振動響巖谷礪礪鬱勃堆朝煙鈎
梯百丈聳寥廓松間細路難延緣倚星撫宿逼孤
漢攬身擲杖凌飛鳶野鼠啣髭佛火滅古寺冷落
如空塵詩人三兩啓荆棘寒花石罅紅嫣然濯冠

沐浴告真宰冥搜玄覽窮迴旋盤盤絕頂更左顧
滄波萬頃相鈎聯高浪駕天鼓澎湃海山宵冥無
人焉當時夏后奠九宇措置瀛海如疏泉苗山稽
功巡狩畢支祁不敢為狂顛神遊一旦歷八極棲
真空石寧非天萬億斯年誦明德禹功在目同星
躔三江導流亦匪易馬臻蹟著兩手胼湖眚萬頃
藉灌溉田楞百索嘉禾廩倉有棲糧足供賦邨無
夜吠容高眠石壇中間我小憇撫今感舊浮情捐
罡風寒峭日西墜老鬣拜浪聲齠齠翫翫蹋盡下
西麓兩手承頰支吟肩

泛舟柳姑廟

鞞紋波動鏡奩紫苔髮鬅鬆纏石耳一片玻璃澈
底明狂披校衲者誰子遙山秀色紛坡陀蕩來雨
笠兼煙叢老學庵今何處所放翁遺蹟冷山阿

鮑山

鮑山山色如眉綠螺黛挽煙青簇簇洞中聞有了
髻童手把銅盃浥銀瀑金仙真誥落荒厓猛虎道
旁時懾伏五色肉芝供客啖駐景無勞更辟穀竭
來山下悄無人間凭一杖桃枝竹不逢羽客佩方
符但見歸農駕短犢山中居人留我住地鑪火煖

新笏熟我懶尋仙思采隱徑來就汝山齋宿

青衣泉

石稜如劍光森森石乳點滴波泔泔陰厓玲瓏寔
突圻誰施斧鑿穿巖心講師昔年鼓鸞吹倒騎白
鳳遙登臨青衣化人獻花果雲踪晦靄難窺尋自
從靈扉一朝鑱空餘仙跡傳古今竭來山椒借瓢
飲風簾浙浙霜抽林神光夜發認何處一泓幽閔
窪而深丹經遺訣世莫曉香巖冷落卑層岑法華
魚肉我不羨腥腐濯盡橫青琴畏遭罰僂斂手避
洞門不敢窺深沉

贈花田先生

啖菹演雅幻竒詭廣奕磔鼠饒名理昌黎東坡庶
相似石湖山谷安足擬野豬峰頂仄容步蒼舌吟
岬莽支柱洞天林屋恣幽探筆鋒鑿鑿真宰怖論
書百韵極根要盤空硬句能獨造殘膏賸馥沾溉
人潛溪何曾及君妙圖山入戶當秋陽陶史謂蕉飲穎
儒佳句垂光芒汪侯覺老輩不可作春泥三尺埋

蜀岡哭汪詩擬祭韓體音聲拉雜詞斐疊堪嗟地
上無良朋茶邨老去溉堂死睥睨一世君誠豪寔
搜玄覽窮秋毫彩鸞寫韵伯虎畫貴妃浴周昉畫兩篇

卓犖尤蕭騷第郎畫馬逞絕足曉行秋棧峰初沐

以上皆集中近詩

心通馬語巧摹寫口繪山容轉清淑拙

處埋機冷賣巧詩中忽作健兒撲

集中有觀健兒撲詩

一卷

冰雪誰能諧金膏瑩淨無纖埃迴環瀏覽醒瞶眊

何時一訪華蟲齋傳鈔箋釋擁萬卷精甲三千固

由鍊振興大雅破邪廓陶鑄餘子空壇坫典誥玉

局荷殊褒從容紳珮還江臯對容手持玉麈尾獻

賦新着宮錦袍清和時節吳陵路斜川月落拏音

去頤曲當筵記豆紅片言脈脈申情愫宵宵寒風

巖罅吹黃紬被冷夜闌時茗攪枯腸聽鼠齧磨丹

似血哦君詩摘詞振藻氣排鼻朱絃疏越出清廟

神仙語氣及不得神龍戲空勢天矯球鏞重器非

笙等酌我沉瀝形骸蘓鴻才壑倒四天下豈止二

十年前無如余下根失裁剪溷跡江邨日頑蹇蹉

跎學殖日就荒浪死虛生恐難免紙窓銀白地爐

紅邀君說詩草堂中急倩小胥安筆硯定有奇語

開鴻濛

踞酒石歌為頤花田賦

踞酒本元次山石魚湖詩

蘚花纏裹蝸涎交蛾綠秀色森塘坳嵌空一竇此

何物非觚非解泓然顛鷗夷滑稽皆不若酒海遊

注浮花泡紫巖玉笋共杯盞銀鬕翠勺真斗筭初
疑商周彝又似虞雉敦渾朴不雕飾肌骨森蔚蒼
勢若怪獸獰以蹲阮嵇色動不敢捫莽莽雲痕雜
酒痕縝潤削成土花碧山癭木樽苦偏仄頭沒其
中渾不識細看乃是雄雉齋前之怪石雕尻股脚
形呀呀脰暉凝結青無瑕犀株半笏儼酒庫華蓋
一峰如麴車中客百斗形渾朴白日蓬蓬霑雲落
豈有巧匠能雕鑿無煩鬼斧助鏤琢雕玉之几躩
碧樽未造怪巧徒紛綸絕嫌蓮子盞細瑣此豈可
以膏吾唇清霄吐納皆沆瀣酒既甘芳石耿介雲

嵐草木盡沈酣終古酒樽出魚背我聞千年酒星
墜為石莫作秋山秋水骨幻為酒器常輪囷不見
鄭家身後欲塋陶家側此石或者鄭所化釀王司
酒正厥職啜醑時見劍門開濡首亦駢仙掌出葡
萄釀美雙瓶矮不如屈注滿巖嶰三茅地肺為糟
正二華雲氣變酒海浮白唱月掀吟鬚老顛拍手
張兩頤麴生風味既不惡石文標格尤躩踞濁清
賢聖置勿辨狂來且復大吸之不然撐腸拄腹五
千卷非此何以發洩胸中竒抹眇秋簷細審視雲
夢石鬣未云似仇池枉用誇髯蘓不能賂酒亦虛

罷街南榨酒聲淙淙築壘要使糟正降長鯨百川
任意吸會見五腹如降肛酒家南董君不愧小謝
作歌清可味煩君多儲百斛松醪春待我爛醉高
歌枕石睡

歌帆石歌為頤花田賦

質如煙島排琅玕色如墨鴉堆髻鬟壺中九華未
足擬仇池一穴通躋攀千峰萬峰縮盈寸屹立不
動形孱顏清肌滑笏不受拭几席四照苔花殷石
帆幾幅疊巉峭石桅一道亾爛編宛如靴紋浪初
起半奩明鏡開秋山週遭上下渾一碧橫排巨舸

山中間水肥帆飽旗腳轉或歌或側波迴環石公
石姥相背望中流歌笑何踈頑天翁好奇露狡獪
生此尤物驚塵寰黃牛白狗千重灘世上行路何
其艱收帆不住落帆少可憐人命如草菅何來此
石帆影間居然小泊黃蘆灣虎頭收拾歸都籃只
恐天風一縱凌潺湲

藏經匣歌

為同年李
牟山賦

西域老僧露狡獪裂紙繙經方寸內縱橫三藏十
二部飾以泥金塗以黛青蓮座上人天師趺座無
言立其背我從方丈細審視定香新藝手新頰朱

書樸遯誰扁棧文字叢殘頗荒怪客言羅漢書經
時鬼伯蠻君畫膜拜三十萬字如蠶絲觸着靈通
無星礙研朱滴露淨無滓歷劫窮塵堅不壞散齋
天女獻花來吹落毫端萬珠琲流傳七種入中土
精靈呵護微塵界諸方縱遇小乘禪濁水摩尼珠
不賣我聞斯語雜疑信小言偶納須彌芥恒河東
流白馬逝語言文字日茫昧此中微妙若可叩直
借金椎醒聾聵龍象蹴踏現眼前安用猢猻裝布
袋

淮陰詠古德州田公座上小賦

袁術

公路浦前白日昏千重駭浪猶奔騰袁曹昔時爭
戰地秋原尚作黃雲屯兄弟閱塘事堪嘆術也讐
紹翻結瓚謬算適足羞先公尚欲覩顏應圖讖里
謠誰記當塗高僭號不聞閭象諫符命之說誠荒
唐可憐蠻觸大夜郎江淮凍饑士卒死宮中日夜
為荒亾蛾眉皓齒競漁獵馮家小女悲馮方瀾山
之敗所自致江亭犇竄如亡羊堆牀十斛僅麥屑
一勺入口無蜜漿當時割據意何取離離滿目悲
禾黍我來袁浦為弔古老龍晝眠蛟夜舞鯨波蝕

盡戰場土

陳登

北風蹶起聲雷礮高堰突兀如壞墻犇騰滄溟險
可怖當時誰挽狂瀾狂伏波將軍守此土倡議築
堰安淮疆洪濤噩浪一束縛安流郡縣無披猖往
者孫曹正格鬪廣陵重鎮非尋常獅兒屯兵列江
許如雲戰艦排兩廂元龍豪氣猛於虎東衝西突
勢莫當軍書旁午不遑息尚能底績為河防偉人
所至有異績千載競頌陳公塘洪澤橋南缺廟祀
一間破屋臨斜陽

蕭望之

丞相門前甲光薄近前扶办還露索吏人拘儒如
拘囚仲翁俛首蕭生羞倉頭廬兒競簇擁道旁相
逢笑卑冗士各有志非所求寧甘小苑東門侯愛
汝一生最強項不肯阿諛附丞相晚年秉政來彤
墀可憐霜華已上鬚束身法網日羅織朱游一呼
仰藥亟與人家國徒憂煎功成不去死吏前曷不
歸種杜陵田

枚乘

七國反秦宗社誰其諫之枚乘者三公誅謝天下

老王騶蹇足悲咤上書不聽何煩寃去吳一旦遊
梁園梁孝園中賓客多梁王禮士來巖阿一夜雪
花催賦草娶來燕玉堪煖老小妻生子髮垂肩能
操弱翰乃公前

蒲輪歷碌安車高枚生老骨埋蓬蒿黃口外舍竄
草莽伏闕上書來枚臯尚書給札平樂館曼倩與
君稱上選狗馬蹇鞠為鋪張祿祠一篇推擅場媒
黷貴幸各有故安用尊官慕嚴助男兒經術多擠
排何妨奏賦為俳諧

馬宮

涓陵冢中三日火傳后丁姬相向望石墻斑斑繡
土花寶衣繡帽猶纏裹當時誰不知莽奸百人崩
壑心為酸追誅前朝議禮者羣公阿指來臺端定
陶啣悲九原下長嗟乃爾忠臣寡君亦當時倡議
人趨避不欲危其身師丹薦君行誼潔何至委蛇
虧大節假皇南臺偽讓時醜顏又作青宮師乃知
世惟通儒能羨新君不見東海馬游卿

孟喜

從田生受周易生且死枕喜膝此事當時或有之
梁正詆訐何其愚趙賓持論縱巧慧易飾易文義

亦贅何如終守王孫言能自立家精且崇師門授
受互欺詭當時盛漢已如此噫嘻卿也有書不授
喜至今諸儒議其子曲臺署長年老矣

嚴彭祖

夏侯勝語可鄙謂明經取青紫當時劉歆亦名儒
利祿何為掛牙齒美哉下伍嚴公子身不為相能
為儒委蛇從俗何為乎抱遺經眊孟死眊孟死二
賢作嚴彭祖顏安樂

小忽雷歌

并序

南部新書載唐韓晉公滉入蜀伐竒樹堅

緻如紫石匠曰為胡琴槽他木不能並遂
為兩胡琴名大小忽雷後獻德皇樂府雜
錄云文宗朝兩忽雷猶在內庫內人鄭中
丞特善之訓注之亂始落民間孔博士東
塘得之燕市蓋其小者名為二絃琵琶

蜀中嘉樹高崔嵬肌理堅緻如瓊瑰誰人伐樹競
鏤刻斲作大小雙忽雷檀槽鈇呀鳳凰齧曲項冰
環挂雙索勞嘈咽切響寥廓馬上提持手親作子
絃嘹唳角聲停鼓此權當伐蜀樂五絲彩線覆龍
首忽入昭陽伴紅袖風生鳳撲花催柳鄭娘曲曲

春風手傳頭轉換聽未終白日青天雷電走含元
殿前夜月寒小吏池頭把釣竿裹來半段葡萄錦
舊事淒涼說女官露盤淚瀉如鉛水碧漢茫茫非
一軌中原瀕洞久風塵此物人間誰料理小忽雷
存大者散汾水年年叫秋雁半寧邏迹一堆塵博
古何從辨真贋金絲軫斷護索偏可憐零落將千
年有客相訪來幽燕買得不惜青銅錢摩挲一似
琴無絃一彈再鼓何人馬唐家秘器已莫彈吁嗟
雅樂誰人傳

樓村夢至一處梅花滿庭一老人以杖數樹

云此十三本以付汝覺而屬禹鴻臚尚基
繪為圖今欲南還以圖索句作歌贈之

東風吹夢來蓬瀛梅花萬樹縱復橫長條紛紛玉
蝶舞細蕊粒粒朱砂頰天香國艷正狼籍遙山遠
水方洄滢夢迴攬身落何所月中田地非人行龐
眉老叟揖客出以杖劃地鏗有聲指付梅花十三
本赤髭白足鮮送迎醒來繁花猶在眼銀色世界
空中呈先生胸懷冰雪清吹花嚼蕊空復情孤芳
與世少合迸亦復於世何所營十年歸計苦未成
荷衣蕙帶藏筍簾泥光湖南好煙水旋鋤小圃依

江城便可栽花擬夢寐橫斜幾本遮檐楹愛者紅
萼敷玉頰時遣翠袖彈銀箏人間萬事適意耳超
然齊物何虧盈坳南春酒亦已熟一卮聊快傾生
平

荅王竹村九日見寄同顧書宣賦

憶昨秋陰阻攀陟旅人閉戶為登高鷓鴣喚我不
歸去得過且過同寒號三夜淫霖不肯住溝水放
溜疑奔濤蝸牛土菌氣翕熠飢鳥窘雀聲悲螻我
生慚無大食刀望愁行歎空焚膏風塵滿衣浣巾
幘蒙頭敗絮胡能豪此時牢愁有萬斛突入馬肆

沾羶臊虎頭顧我忽狂叫曰胡不達長憊切塵中
之人烏可語不見海客署釣鰲滄溟拔浪會有日
那得老死埋黃蒿吾生及時行樂耳名香美酒勤
熏陶不爾雙丸疾於兔君今逼仄將焉逃曷不傾
家買紅粉佐以百斛松花醪上書北闕固瑣屑求
仙東海尤煩囂虎鼠用舍有何定百年豈不視所
遭但得雙螯時在手相將痛飲驅牢騷安用辛苦
死文字萬事種種欺顛毛碧翁聞言亦頗笑斑斕
霽色侵霜袍研丹快讀瑯琊句天晴明日求朋曹
題悔餘證因圖

先生本是飛仙人蚤歲尤耽清淨退隨緣偶現宰
官身颯然不入朝衫隊心空及第已多春獨愛跣
跌證三昧新署頭銜號證因即栗橫肩笠不戴湛
然清明樂禪悅定香一縷涼心肺溪山花鳥得真
性草木雲嵐紛蔓藟已覺平生萬念灰却看峰角
孤亭在霜眉碧眼一尊宿觸着虛空何罣礙多生
結習盡唐捐何有端毫萬珠琲不勞彈指算河沙
但說浮榮已心痲披圖清涼洗煩熱洞壑瀟清吾
所愛他生願結香火緣壇花可掃草新刈翻笑王
官谷中叟本無榮辱何須耐

題相馬圖

相士愛磊落相馬愛神駿佳士見已罕良馬得亦
僅世無伯樂亦久矣駿骨何由致千里披圖愛此
間色驪三花剪鬃新鑿蹄得非天馬來從大宛國
奮身直上浮雲佞使君何處得此馬圍人披鞍垂
楊下首如翔鸞背鳧臆桃花頰白好顏色一團旋
風騎不得絡頭安用黃金勒是時訟堂清且閒錦
石鋪地苔斑斑科頭箕踞巖壑間熏風庭院朱花
殷使君夫豈百里才珠光劍氣傳八垓正如籟雲
一躍去萬里下視人間凡馬真駑駘使君為人負

奇氣使君相馬得真意神行電邁騁絕足此馬何
當置閒地我聞天閑上馬皆乘黃豐膺大股七尺
長珠鞍玉轡被錦繡長楸芻秣水草香雕圓腹飽
汗易出往往遠道難騰驤又聞鹽車之下有驥騏
長鳴仰首露塗泥一朝伯樂親拂拭旁觀羨殺黃
鬚奚梳駮擁霧風生尾蹴踏直與奔馬齊何如此
馬阜且偉神駒初出西注水房星毓秀不偶然終
遣龍驤報天子

烏獬豸歌

為宋商正
太宰作

濯龍門外香塵起天厩飛龍五花紫道旁借問何

光輝尚方賜馬尚書歸尚方駉牝三萬匹至尊妙
選皆辟易衆中韝出安而馴賜之可以榮老臣錫
汝佳名烏獬豸果得千人萬人愛虎文龍臆身權
奇雕章寶鐙黃金羈勝聳蹄懸屹不動須臾蹴踏
神俱悚涼秋颯爽氣騰驤道旁觀者如堵牆風動
盧溝橋畔柳八騶在前馬在後尚書恩榮服賜衣
乘馬安穩如乘車黃絲絡頭小延佇馬忽戀闕當
風嘶西陂芊茸水泉好不待來年試春草飲齧有
態馬放閒可憶赭羅蹠躐天衢間三公行田祛鹵
簿此馬時時為先路歲華殫指何匆匆又見星軺

趣潞公重來文陛荷殊獎拂拭還看馬齒長

送商正太宰致政歸里

一川綺縠煙濛濛汴隄草色何丰茸清冷池邊錦
繡谷樂春園上逍遙翁仙人駐世方兩瞳御風騎
氣光熊熊迴翔文陛四十載致君堯舜歌時雍大
儒出處有本末功成身退歸雲峰郊西卜築富林
麓一園竹樹堆青葱濃桃郁李正狼藉壽藤古木
穿玲瓏遨頭春遊芍藥紫婪尾酒熟山櫻紅閒尋
田父量晴雨時約鄰僧携笠筇放鴨亭前小延佇
愛此十頃玻璃風田衣山屐樂清遠旁人不識為

三公夔龍止壑一身備四海仰望侔中嵩籥雲鞭
鹿下霄漢翩然謁帝蓬萊宮紫衫玉帶照眉宇丹
顏煥發如芙蓉車旁倒繫烏獬廌披拂霧鬣搖風
鬃玉清閭闔春爛漫瑤堦仙仗光瞳矐旌節三島
朝玉帝真官百歲稱青童君臣魚水樂莫樂杲杲
如日初升東

奉題大司寇新城公荷鋤圖

按帶經而耒語出漢書庚辰夏公有御
書帶經堂匾額之賜因命禹鴻臚繪此圖
煙江一水何淪漣掠青飛翠山蜿蜒雨中疊嶂尤

清妍空濛似欲無山川猿聲忽送蒼崖巔波心淼
淼聞扣舷翠屏千尺來延緣決渠流水衝迴漩縈
林絡石鳴涓涓水田百幅鴉青箋溝塍莎草煙芊
絲農家風物今宛然荷鋤者誰行陌阡有人寄興
思林泉日者 睿藻頌中天帶經兩字華堂懸倪
寬經術史冊傳煩渠好手摹雲煙米高筆法麗且
娟風景點染夔州篇公方手握造化權踐歷文陛
光星躔臯夔稷契共比肩 九重倚毗日益堅時
清未許東山眠鵲華山色遙鈎連渚雲滅沒汀花
鮮空餘夢繞菰蒲邊何時荷衣訪偃佺予將從公

賦歸田

題李蒼存秋穫圖

煙蒼蒼樹茫茫秋稼熟刈穫忙長淮一水流湯湯
故家喬木唯耕桑高田低田紅稻香眼見穠稔秋
塍黃黍稌既已登我場雀鼠不得入我倉空園雉
兔竄秋草野鶉拾粟亦得飽東家挈筥西家迎連
袂踏歌來樹杪山翁荷耒煙際山神仙標格多蒼
顏孤村流水樂平遠田衣山屐時往還知君不是
扶犁手想亦年來猷奔走田園小住未為非斜陽
獨立三叉口垞南山木青扶蘓環溪水遶菰蔣蒲

早菘晚菹差不惡殘年飽飯娛朝晡山田百畝屋
一區人生此境何可無公卿有命不愁晚且作識
字耕田夫

題碩俠君噉荔第二圖

陳紅江綠名瑣細啖荔平生有遭際閩山粵嶠君
舊遊色香風味誰當替聞君昔在幔亭隈杜鵑枝
頭抵死催何曾西禪寺裏去只教飽食山丹回蠻
風蜚雨枕榔樹尉陀城下經年住最愛新興香荔
枝綠毛倒挂誰能數蕉衫羽扇長逍遙頰丸入口
已紅消滿摘筠籠方果腹左車不畏側生搖圖成

累累君絕倒閩南何如嶺南好天生尤物皆策勳
昔人聚訟徒紛紛從來口腹無正味老饕大嚼斯
為貴虛空比擬得未曾吳娃越艷皆虛稱君不見
玉環飛燕誰敢憎

大觀太清樓二王法帖歌

晴窓潔几無一塵細看標識驚倒人墨華流傳盡
竒秘卷帙觸手猶鮮新會稽風格真超詣青李來
禽有生氣剝損黯滅已足珍况茲完好尤為貴大
觀承平數十年國初閣帖新雕鐫驚鸞翥鳳互軒
舉家雞野鶩紛蟬聯楮墨親題煩乙夜一時得者

千金價鑒賞端知比貞觀鈎勒還能壑淳化太清
峩峨十丈樓神霄天子何風流赭袍玉鳥劇揮灑
臣京倚按標銀鈎當時摹拓詔王著他日辨別推
徐璠徐浩之子印縫分剪微能識響榻爭傳太師筆宣
和舊事足酸辛玉溝嗚咽宮車出樓中寶翰嗟無
有白草黃沙間枯柳巧偷豪奪一千年真帖蒼黃
落誰手神物從來有革除延津得劍浦還珠翰林
崑木先生嗜古過顛米寶此不啻如璠璵春蚓秋蛇縮
晴雪坐客歛容齊嘆絕虞山詩後見何年康熙戊
子秋七月

跋瘞鶴銘卷尾

江空月黑水怒號何年老鶴來江臯鶴壽吾不知
其幾用銘詞斷碑剝蝕雲雷交鑿銘者誰筆奇峭大
書深刻留山椒厓崩岍拆墮寥泐鸞颺鳳泊隨波
濤殘缺漫漶亦時有夜深寶氣千層霄千餘年來
鮮好事陳倉石鼓歲弃牢我昔巖居傍焦嶺大江
駭浪迴春潮潮聲雷礮喧百怪捎瀆撒漩穿峰腰
欲下龍堂搜古碣望而不見心空勞王君探奇力
最猛能鞭巨石驅神鰲興發榜舟下洞壑天吳陽
侯紛遁逃摩挲癡厓厓骨露縱橫錯落森斗杓搨

館園詩鈔卷二
成日以指畫肚華陽老仙如可招我於書學素駢
昧雙腕有鬼叢譏嘲評書尚骨不尚肉愛此龍爪
衝驚颺徑欲從君乞此本點畫波磔窮秋毫天寒
筆凍手皸瘃浮白大叫風蕭蕭

倚韻答劉太乙張日容

蝸廬偏仄寄窮巷陡覺羈孤失豪蕩垂頭擾擾蟻
旋磨入世俵俵瞽無相黃雞白日奈人何眼前並
少玲瓏唱清泉翠竹了何許烏帽紅塵客心悵竭
來高會城東園暫拂冠纓樂清暢有客示我一卷
詩硬語盤空絕依傍張老匠磊砢韓杜儔劉生乙

峯寄白蘓行竹花不實鳳雖飢君縱不言吾意愴
修書給札例寒餓煮魚蒸稗誰相餉那知待詔金
馬門只夢江鄉白鷗舫江鄉四月好風景水可漁
釣山可望吾已神遊吳越間興來一枕滄波上錦
衣騎鯨恣蹴踏海客釣鰲足風浪醒時依舊弄觥
舡酒酣喝月月無恙

題維摩居士圖

我讀維摩三卷經現身示疾非荒怪人生大患緣
有身認疾為身同腐芥跏趺丈室聽說法龍象蹴
踏了無隘天女莊嚴空色相天花散落消根蒂猶

覺師利多語言濁水摩尼珠不賣蠻君鬼伯競合
掌得聞般若如搔疥先生同是清淨身久洗多生
綺語戒宰官今住毗耶中妙喜不落恒沙界霜顱
碧眼一尊宿獨抱紅藤棲破解手提古佛得心印
席捲諸方盡膜拜此來原為求法出露地白牛就
月晒寶華世界納微塵百丈琉璃貯清澗何曾饒
舌學豐于聊與羣兒醒聾聵妙諦不落箭鋒機迅
掃風雷空萬派一念遊戲浮漚間慧劍礮斫意差
快優鉢曇花現有時光陰一瞬無成壞垂頤枯坐
依團蒲人天擁衛非孤介只今隻履又南還著紫

伽梨唱金璫可憐我亦小乘僧草鞋覓路方行邁
他時願結共香林煨火空山傍羣獐

再疊前韵柬友人

被酒欽寄搖五嶽潑墨淋漓驅百怪大手思扛龍
斛鼎小言未納須彌芥眼中之人不稱意蹴踏頗
覺塵寰隘無端驅馳來北道自笑浮雲根絕蒂真
成穉穉何敢狂縱有癡呆未堪賣投刺畏人如縮
蝟束帶見賓真病疥東堂洒掃容我住逢人匿笑
君屢戒輔之酣呌太張皇羊曇真率無畦界沈酣
作達光祿廚碁槩消憂叅佐解東野惟于昌黎親

後山曾下南豐拜有時黑夜說虎望有時白日攤
書矚砉然天地入胸臆跼蹕風雷餐沉瀝危言底
須設城府快論不妨驚聾聵上及皇墳遯千載下
納江河窮百派種忘粳秫意既親性融水乳心尤
快劇憐懷抱對君盡狂語時憂金石壞凡馬生來
負伯樂醜女無端累媒介歸卜三椽日灌園閒買
一畦親種薤曳尾泥中潜井底那得飛騰與超邁
丈夫只合把耒犁白石歌成飯羣獐

說北食三疊前韵

南烹今日遠莫致北食年來恬不怪肥者大肉硬

者餅羶者青葱辣者芥夜來陡覺槃桼空清曉未
愁食單隘嚼後冰桃惟剩核摘去畦瓜尚留蒂蝦
菜提筐竟屢得鱸魚上市原爭賣嫩黃菜雞便口
腹軒切子鷺妨癬疥烹羊日飽大官廚魚鱉難持
菩薩戒灤河土鯽餉鄰里關東鹿尾來邊界傳呼
熱客到朱門招致冷官離破廨異味先許饗人嘗
佳媛欲下廚娘拜韭蘼香羨早登枰橘醋甘酸未
須晒餅蒸十字味酥醃乳桐三升色清瀝便稱老
饗人不免日圖舖餒君真贖乞得醯經方叔傳撰
成食法嚴龜派

唐書有食法

顏然放箸大喙噓任

意一飽吾已快頗覺垂涎禁鬻空不愁染指侯鯖
壞蟬稱甲士任橫行果號文官太孤介從來腐儒
負此腹終日一餐惟白殭冰壺冰傳太酸寒鼎食
鼎烹亦豪邁會須啖公八百里不然竟飯千斤糖
李蒼存南歸索余後圃講堂詩賦此贈之

都梁一水盤輻轡喬木蔚蒼川原紆清時門第誇
崔盧詎知中有非常儒李君古之列仙臞犀顱虎
頰偉以訐早歲風格與衆殊手操柔翰芟榛蕪立
言驚倒談遷徒命意落筆皆瀕臲行間字裏森矛
及天機自發非規模徑路陡絕誰瑕瑜豪氣萃律

壑萬夫常年愛狎菰蔣蒲望漑谷口為膏腴落花
香撲青絲絢渚可浴鷺汀眠鳧草荒楊子宅一區
抽毫朱墨沾襟鬚碧梧翠竹涼侵膚筆牀茶竈紅
糴稊名香班班斲鷓鴣窪罇可飲罌可跌竭來驅
車適 帝都相與造請吟嘯俱開心寫意懷抱攄
牀頭老春夙所儲雄談往往西日徂屋角雨脚如
繩羸輪蹄攘攘滿道衢寧知我輩為歡娛短扉深
巷吟鼙鼉外論從旁怪且迂兩人聞言時盧胡禮
法安用相牽拘君今將踏承明廬禁庭珥筆垂華
襦一時辨論驚石渠講堂幽夢時有無圃西猿鶴

閒招呼堂中主人曷歸乎我將訪君臨淮隅聽君
安坐歌唐虞

題晴川秋望圖

漢江秋老丹楓凋鯨波駭浪聲怒號英雄割據事
已矣江山壯觀未寂寥鸚鵡洲前漢口路紅亭白
塔堪逍遙蒲帆百幅疾於鳥軒若猛箭離弓弨西
風陡峭夜波激亂雲脫壞開青霄羽衣仙人控黃
鶴熒熒顏色如陵茗先生身著宮錦袍隱囊麈尾
風神超氣吞江漢括鄢郢飛揚跋扈文章豪只今
披圖得勝覽凭闌玉立才孤標時清荆楚靜煙嶠

安流無復鼉鼉驕登高望遠立瀟湘頗欲痛飲歌
離騷羸顛劉蹶亦偶爾何異孟水浮堂均文章未
毀賴公等看底柱石鞭神鰲功成身退他日事不
須幽夢偕漁樵

擁青閣讌集不得簫字

涼天翠色堆青瑤九衢夜靜無煩囂澄觀堂中足
風景金樽銀燭影動搖四序蒼涼屬秋仲一輪皎
潔惟今宵山公置酒招我飲步屨側轉林塘均徑
花艷豔吐紅萼秋雲鱗鱗拖翠綃我時無事似犀
首頗能痛飲歌離騷少焉亂雲如劈絮涼蟾爍爍

光層霄清樽文字樂良夜安用玉管兼瓊簫玉堂
仙人語神俊絳紗諸子才孤標瓊盃綺食青玉案
百枝爇滿金蓮膏迴翔薇省盛述作礪硠擲畫翻
螭蛟座中燕許推大手抵突屈宋凌雄褒休文樓
中富八詠開口脫瀉如奔濤王生下筆猛如虎衙
官屈宋窮鏤雕數峰江上青可數湘靈鼓瑟雲車
遙隱囊紗帽者誰子卯君戴笠風神超我生慚無
大食刀抱書環堵思鬱陶今夕恍遇騎鯨李倚天
長劍開沱寥鷹揚虎視未足道渴羗一吸聲如潮
從教百事且敗意只今對酒猶能豪何人擲杖為

長橋瓊樓遊戲隨王喬霓裳散序置不記且盡一
斗紅葡萄西鄰美人開紗寮熒熒顏色如陵苔東
鄰醜女嫁不售首無膏沐同蓬颺共此天邊一輪
月人生偏仄將焉逃我有舊隱三山榭故山猿鶴
時招邀不須惆悵宮錦袍徑欲歸去隨漁樵塵埃
流浪貌粗醜心知慚愧王東臯脫復當筵不痛飲
無乃千秋徒寂寥因之豪蕩更感激目極萬里窮
秋毫起振觥杖甘蔗頗亦自嘆平生遭歸途茗
芋步歌側蝙蝠掠面莎雞號天明走筆作長語昔
之所見真斗筭

飲酒

斑斑瘦竹青成筍，
簌簌嬌花紅有暈。
屋山小鳥喚提壺，
沽酒村場忘遠近。
年來無事似犀首，
頗借濁醪平喜愠。
三杯芒角任君生，
一笑蹉跎原我分。
當筵痴客未須愁，
從古達人惟任運。
且憑白墮說歡情，
安用青燈述孤憤。
劉郎荷鍾誕堪師，
阮生兵廚窮可哂。
人生一醉須自謀，
莫向官廚思美醞。

題李天山鑑湖垂釣圖

我來鑑湖六十日日，
吟眺三山春左携書卷。
右杯筭延緣小艇，
當湖滢若耶雲門飽遊。
歷蘭亭禹

穴攀嶙峋長隄亘天，
若蟠螭短策入手芟荆榛。
道士莊前石齒齒，
柳姑廟後波粼粼。
懷古重經陸埭口，
支筇曾踏龜山濱。
道逢老姥貧賣扇，
亦有樵客歸負薪。
連江楓葉落碎錦，
前溪月色鎔凍銀。
浮家泛宅樂莫樂，
誅茅幾作山中人。
偏門曉出歸及夜，
會稽燈火填城闔。
同遊賓客已雲散，
惟見孤鶴橫秋旻。
李君示我垂竿圖，
長身玉立來峨岷。
洞庭漁父拋箸笠，
羊裘老子垂釣綸。
坐依古松撫流水，
旁有小童鱸白鱗。
黃塵烏帽忽覩此，
使我愴恍開心神。
君也金門久陸沉，
持橐簪筆趨楓宸。
眼中之

人惟吾子髯兮軼羣尤絕倫忽復長謠反林屋知
君久與煙霞親憶我前遊跡已陳他時訪君期卜
鄰何妨抱甕竟終老出處豈必輸天民子真故居
風俗淳老學庵井跡未淪羽衣吹笛尚念我會須
裹致湘湖萼近招放翁遠賀監松下醉倒歌冠巾
題汪玉輪修撰秋帆圖

秋霖灑灑夜不休溝水亦作三峽流潞河東下更
駛激峭帆一縱不復收何人徑駕煙際舫使我惜
別心煩憂汪倫明朝去京國卷書已上烏犢牛君
也通籍官禁近廟堂鑠藉琳琅球如何請急忽南

邁天邊款乃隨棹謳君言清漳有夙疾年來困若
魚中鈎林泉痼癖入夢寐漁樵徒侶思汀洲但得
置身向巖壑吾意已適疾若瘳閒園魚菽日奉母
輕軒親導長夸猶及時行樂未晚晚無心更戀車
前騶布帆十幅喜無恙飄然不繫乘虛舟我聞君
言發長喟乞身歸去真良謀君家園林洞戶幽嘉
樹直幹比指稠有田可耕秫可莠秋山嵐翠軒窓
浮長松百株蒼髯修丹楓落落羅道周紫衣仙人
乘素虬日登縹緲絕頂之飛樓興酣落筆勁且道
時尋某水兼某止如君真是洪崖儔紅豆山莊有

遺躅餘事猶足商千秋臨岐對君色頗妬神驥脫
銜鷹脫鞵我今荷衣正憔悴風塵何事還淹留明
當榜舟入圖畫同君快作滄溟遊

送劉豹南侍御視鹺河東

周官食貨各有志形虎苦散監飴戎海泉井水雖
異地煎和掃鬻將無同并州池水雪花白顆鹽從
古誇河東姑射之腰傅巖尾水天一碧摩青銅風
篩露炙自凝結不假熏灼勞人工天生五味養百
物民鮮天札年和豐潤下作醜國大寶算綿權筦
頒正供時平詎藉弘羊計安用山海歸牢籠劉君

登朝富經術蔚如清廟懸鐘鏞敷厯臺省有異績
書名 御座恩眷隆 帝曰絳州股肱地詔汝領
權騎青驄一時亭戶競歡喜牢盆衡石弊竇空奸
吏屏迹俗饒衍昔時劉宴今再逢闕門日出車輪
紅畫旗獵獵乘長風從奴十騎珮韎鞞鑿蹄驕馬
高纏髮與君投介自京洛矢心白水盟青松道旁
凍柳若為折臘雪墮地光融融中條石室雄雲中
愛看鷗鷺摩蒼穹作歌吐氣如長虹

東籬詩為趙价人作

東籬渺何許遠隔天一方南山空翠當戶牖舉頭

但見黃花黃我從好尚想標格配以蕙帶兼荷裳
典午風流邈千載何期再覩陶柴桑緘書來索詩
惠我前人章長篇鉅製垂琳瑯典謨雅頌皆所長
雪泥鴻爪留空墻卷中老宿半在亡知君採隱東
籬旁紅紫繁艷白者良詩人愛花老更狂餐英從
來重晚香滿城風雨催重陽秋空寥泐孤鴻翔白
衣送酒不成醉還撫無絃琴一張

題安溪先生家難詩後

薰風自南發清吹勁松謾謾涼雲墜諸生列坐促
談犀偶話當年乙丙事乙丙之際無事無南山峯

律嗥妖狐公然道旁恣劫掠三窟盤踞通交衢是
時吾師年十四讀書家塾偕諸季已看威鳳正摩
雲誰信祥麟忽遭繫挿天青嶂勢嶙峋叔季纍纍
怨且嗔此日鴟張愁北里異時豕突起東鄰褒甫
先生奮然怒隻身救援謝徒旅為申大義至賊中
浩氣乾坤莽措拄賊意未可口舌爭下山歸去惟
吞聲吞聲不敢見太母白日倉皇草間走得遇山
僧事亦竒芒鞋躑躅將何之後山一線羊腸路即
是三軍蟻伏時在原之義情日迫誠意先教感僮
僕僮僕人人氣拂雲荷鋤持挺都紛紛冶坊佃作

不滿百拂拭已足張吾軍雨過宵分泥滑滑路黑
山深足難拔猿猱行處不堪行勇者先登纔廿八
草衣木屐影寥寥偵卒無人知我曹初登山候天
將曙及破巢時露未消功成制勝在倉卒賊衆抱
頭自奔叱精誠盡處神智生人力窮時鬼神出舉
室前峰尚繫孽賊軍又報發漳泉十九人為萬人
敵異事今日猶傳宣或如奔霆或掣電此後山前
日酣戰聖哲神明默護持兄弟荆榛苦輾轉守者
回心乍許歸豈知移宅又重圍蘭秋七月穿針節
數定前期更莫違痛餘思痛歌當哭山刺蒺藜猶

在足百戰風前殪虎狼一夕燈前全骨肉指揮軍
中閱兩年先生鬚髮亦華顛拂衣別家去不顧蹈
海高踪慕魯連我聞斯言三嘆息獨行如公實奇
特承平之世忠孝家儒雅何曾識兵革祇緣義激
憤鬪爭長令鄉閭日矜式讀書少讀前朝史趙孝
姜肱何足擬廉頑立懦非偶然聞風百世猶興起
吾師奏事乾清門感激陳詞動 至尊特頒 宸
翰至海嶠驚看寵錫來 天閣子孝臣忠澤未泯
逸事他年互叅証垂名國史自芬芳何止流徽播
家乘

遊萬泉寺

果下趁趨曉來猛導我看山趣獨領東坡自是飛
仙人籥雲已過招提境支筇殿角神倍王握手山
房冠不整高低禾隴聞稻香曲折水田送秋影老
柳衰荷水面亭大瓢小杓松間癭披榛闢莽尋萬
泉山路崎嶇樂清迥既無塵土三丈樸况有水雲
一千頃高人詎肯受羈馱野鶴尤能伸脰頸就中
何可少禪悅此地端須搖舴艋藕香一瓣心骨清
味似醍醐風趣永已見泉流白石根還看月出孤
松頂升高望遠腰脚健朶朶芙蓉臨倒景香林鮮

帶復勾留隨意村醪雜山麩輞川後約和裴王窺
園不待鶯三請

庚子上巳後六日泛舟樊口作

齊安古郡江之涯東風三見吹柳花樊山山色絕
佳麗春波十里開江沙昔聞司勳寄薄宦吟箋日
把吏散衙至今猶傳睡足處南州雲夢蒸紅霞後
來王蘓繼風雅一官差稱江山佳竹樓結構捲秋
籜東坡瓦礫收春茶笋香魚美酒復旨五年樊口
堪移家煙江疊嶂挂簷額長松落雪楓翻鴉古今
何異一彈指已覺此樂如羲媧我今行役萬里賒

蓬松兩鬢空髮髯浮湘到此復嘆息望驚歲月生
咨嗟偶乘閒遊載春酒急呼黃帽撐枯槎西山晴
翠正欲滴鳴春山鵲聲楂楂况逢知己千里適奇
文健筆驅龍蛇百壺清酒那足注欲瀉江灩傾樽
窠回頭望客且勿譁不見落日啣山斜短歌聊復
足快意綠鞵催喚鳴銅琶

臘梅

檀痕一捻枝頭小黃雪玲瓏影交抱江南萬樹未
足珍冀北一株覺娟好雪後晶丸爛漫開
種非凡胎天花合送維摩室定有文殊師



